

# MAILA ANG DIOS PINAAGI SA IYANG MGA KINAIYAHAN



Langitnong Amahan, nagapasalamat kami tungod sa prebilibiyong pagpanguna Mo kanamo dinhi sa Beaumont, Texas, pag-usab. Samtang ako nagalantaw niining mga balkonahi, mahinumdoman ko ang mga panahon samtang ania kami dinhi kaniadto, ug ang dagkung mga butang nga Imong gihimo, nga sa walay pagduhaduha daghan adtong mga tawhana ang ania dinhi nagalingkod karong gabhiona. Kung wala Nimo tandoga ang ilang masakitong mga lawas, wala sila dinhi niining gabhiona, apan Imong gihimo, ug sila ania dinhi. Daghang mga handumanan ang nagapabilin, dala namo kini tanan paingon ngadto sa Eternidad.

<sup>2</sup> Nagaampo kami nga Imong igahatag kanamo ang usa ka dakung pagbubo sa Espiritu. Magkauban kaming panalangini. Panalangini ang matag iglesia, ang matag sakup.

<sup>3</sup> Ug, Ginoo, panalangini ilabina ang among mahal nga batan-ong igsoon dinhi, si Igsoong Pearry Green, nga nagapanguna sa pagpaningkamot nga maipahayag Kini. Hinaut nga ang mga tawo niining—niining maanindot nga siyudad makita ang—ang pagbati nga ania niining maong batan-ong lalaki alang sa mga tawo dinhi, aron dalhon sila ngadto kang Cristo nga iyang gimahal. Ug gipaningkamotan niya nga dalhon ang matag ministerio nga sa hunahuna niya maoy husto, nga giusisa niya pinaagi sa Pulong, ug gusto niyang makita nga maluwas ang mga tawo.

<sup>4</sup> Tabangi kami, Amahan, diha sa among mga pagpaningkamot, samtang among ginatugyan ang among mga kaugalingon Kanimo alang sa pagpanerbisyo, ngadto sa pagtahod ug paghimaya sa Dios. Among ginapangayo kini sa Ngalan ni Jesus. Amen.

<sup>5</sup> Karon, ato lamang hinumdoman, nga sa matag gabii karon, pag-uban kaninyo ug usa pa, o pag-tawag sa telepono ug sultihi ang uban, ug sultihi ang kada pastor, kada simbahan. Bisan unsa pa kini, bisan kon lahi pa sila kanato, samtang nga mosulod ka lang, molingkod, magminatarung ug magminaayo, mapasalamaton gayud kami sa imong pag-anhi dinhi.

<sup>6</sup> Ug karon dalha ang inyong Biblia, pagdala ug lapis, isulat ang teksto. Ipadayon, susiha sila, siksika sila diha sa Pulong ug tan-awa kon sila ba'y husto o dili. Kita n'yo? Ug unya ayaw'g gamita ang inyong kaugalingong teolohiya, tan-awa kini diha sa pamaagi nga nahisulat ang Biblia. Kita n'yo, daghang

mga higayon nga maingon nato, “*Mao kini* ang tumong Niini, kini maoy kahulogan Niini.” Ang Dios wala magkinahanglan ni bisan kinsang maghuhubad, Siya ang nagahubad sa Iyang Kaugalingong Pulong. Kita n’yo?

<sup>7</sup> Miingon ang Dios, “Motungha ang kahayag,” ug diha ang kahayag. Wala na kana magkinahanglan—magkinahanglan ug bisan unsang paghubad. Siya...Nahitabo kini sa pamaagi gayud sa Iyang pag-ingon. Siya miingon, “Ang usa ka ulay magasamkon,” ug siya nagsamkon. Wala na kana magkinahanglan ug bisan unsang paghubad.

<sup>8</sup> Nagsaad ang Dios sa siguradong mga butang alang niining kapanahonan nga kinahanglan gayud mahitabo! Giingon Niya kini, nan wala na kini magkinahanglan ug paghubad. Maoy giingon sa Dios, ug Iyang ginahubad, Mismo, busa ang giingon sa Biblia nga Kini walay bisan unsang kinaugalingong paghubad. Ginahubad sa Dios ang Iyang Kaugalingong Pulong pinaagi sa pagpanghimatuod Niini.

<sup>9</sup> Karon unsa kaha kung manindog kita samtang atong basahon ang Iyang Pulong, gikan sa Basahon sa Mga Hebreohanon, sa unang kapitulo. Ang hinungdan nga ako kamong gihangyo sa pagpanindog, mao ang pagtahod niining Pulong. Nagatoo ako nga ang Pulong mao ang Dios, “Sa sinugdan mao na ang Pulong, ang Pulong uban sa Dios, ug ang Pulong Dios. Ug ang Pulong nahimong tawo ug mipuyo tipon kanato.” “Si Jesus Cristo mao kagahapon, karon, ug hangtud sa kahangturan,” mao kana’y tema sa atong mga pagkampanya. Busa, sa dihang nagabasa kita sa Iyang Kaugalingon nga nasulat dinhi niining Pulong, nagapanindog kita. Sa dihang nagapanumpa kita’g pagdapig sa bandera, sa dihang nagalabay ang atong bandera, nagapanindog kita sa pagtahod sa atong bandera, sa atong nasud, atong kinahanglan buhaton kini. Nan, unsa pa ka labaw nga kinahanglan natong manindog sa dihang atong ginabasa ang Pulong sa Dios! Mga Hebreohanon 1:1-3, samtang atong basahon.

*Ang Dios, sa daghang nagkalainlaing panahon ug sa nagkalainlaing paagi misulti kaniadto sa karaang kapanahonan ngadto sa atong mga ginikanan pinaagi sa mga propeta,*

*Apan niining kaulahiang mga adlaw siya misulti nганhi kanato pinaagig Anak, nga iyang gitudlo nga manununod sa tanang mga butang, pinaagi kang kinsa usab gibuhat niya ang kalibutan;*

*Kini siya ingon nga panganinaw sa himaya sa Dios, ug tukma nga hulad sa iyang kinaiya, mao ang nagasapnay sa kalibutan pinaagi sa gamhanan nga gipamulong niya, sa nahimo na niya ang pagpanglinis sa mga sala*

*sa katawhan, siya milingkod sa too sa Halangdon sa kahitas-an;*

<sup>10</sup> Mag-ampo kita. Pila ba karon, nga nakaduko ang mga ulo ug mga kasingkasing, gustong magpahinumdom diha sa pag-ampo, nga pinaagi niining panagtigum, kung asa man, igatugot sa Dios ang inyong hangyo? Itaas lang ang imong kamot. Makita sa Ginoo ang imong kamot.

<sup>11</sup> Among Langitnong Amahan, ingon sa gilay-on nga makita sa akong tawhanong mga mata, adunay daghan kaayong mga kamot. Sigurado nga ang pinadayag ni Igsoong Green ug ang akong tinguha sa pag-anhi, husto. Karon, Amahan, ihatag kanila ang ilang gitinguha, sumala sa Imong Pulong ug sa Imong saad. Among ginatugyan sila Kanimo. Ug hinaut nga ang among kinabuhi mamahimong mosibo gayud diha sa Pulong, nga ang Pulong mamahimong unod sa taliwala kanamo ug igahatag sa mga tawo ang pagtoo sa pagkuha gikan sa ilang listahang-pundo sa Langit, nga gipahimutang na ni Jesus alang kanila sa dugay nang panahon, alang sa ilang mga sala ug balatian, samtang diha sila sa ilang panaw. Panalangini kami karon, kami naga-ampo, samtang kami nagapaabot Kanimo sa pagpadayag kanamo sa Imong Pulong, ug himoon Kining unod sa among taliwala. Kay amo kining ginapangayo sa Ngalan ni Jesus. Amen. (Makapanglingkod na kamo.)

<sup>12</sup> Karon buot kong, kon mapaninguha lamang ninyo nga, wala nay paglibotlibot pa labaw kaysa kung unsay inyong mahimong itabang, ang pasabot ko ang pagtindogtindog ug paglakawlakaw, hangtud lang sa sunod nga kwarentay singko, singkwenta ka mga minutos, mga ingon niana. Karon, ang—ang kaka- . . .

<sup>13</sup> Ang butang mao kini, nga gusto kitang masayod kung unsay Kamatuoran. Ug usa lamang kana ka Kamatuoran ang akong nasayran, mao ang Biblia. Karon, pagahukman sa Dios ang kalibutan sa umalabot nga adlaw, ginatoohan nato kana, ug ang matag-usa kanatong mga mortal pagadad-on ngadto sa Iyang Presensya alang sa paghukom. May pipila ako ka mga sulat nga sinulat dinhi, ug mga Kasulatan nga gusto kong ipahinungod sa pipila ka mga minuto.

<sup>14</sup> Karon hinumdomi, kung ipangutana ko man niining gabhiona, “Aduna ba’y Katoliko dinhi?”

“Oo,” sila moingon. Ug tingali . . .

“Bueno, pinaagi ba sa unsa pagahukman sa Dios ang kalibutan?”

Sila moingon, “Sa Katolikong iglesia.”

<sup>15</sup> Nan moingon ako balik, “Unsa nga Katolikong iglesia?” Dili sila magkasinabot. Adunay daghan kaayong mga panagbangi.

Ang usa'y Romano, ug ang laing usa'y Griego, ug ang Orthodox, may uban pa. Daghan kita niana. Kon ako moingon . . .

<sup>16</sup> Motindog ang Methodist, moingon, “Pagahukman Niya kini pinaagi sa Methodist nga iglesia.” Bueno, kon mao kana, nan ang Baptist wala nay kahigayonan. Ug kon pagahukman nila kini pinaagi sa Baptist, nan ang Methodist wala nay usa ka kahigayonan.

<sup>17</sup> Tungod kay, hinumdomi, usa ka diyutay'ng sayup pagkutlo sa Pulong, usa (dili ang tanan niini, dili gayud tanan sa usa ka bersekulo), usa lang gayud ka diyutay'ng sayup nga pagtoo sa Pulong, nahimong hinungdan sa matag kamatayon, matag balatian, matag kagul-anan. Mao kadto si Eva, sa tanaman sa Eden. Karon kon kining tanan maoy bayad niana, tungod lang sa usa ka babaye nga nasayup sa pagsabot sa Pulong. . . Siya, wala niya kini gibuhat sa tuyo, siya “nalingla,” sa giingon sa Biblia. “Nalingla,” pinaagi sa Pulong, nahimong hinungdan sa tanan niini, nan ikaw ug ako dili magabalik nga adunay bisan unsang kulang kay sa kinatibuk-ang Pulong.

<sup>18</sup> Karon, ako nagatoo, nga nagaingon ang Biblia nga dili gayud Niya, wala ako nagatoo nga pagahukman sa Dios ang kalibutan pinaagi sa iglesiang Pentecostal, pinaagi sa Methodist, Baptist, o sa Katoliko. Pagahukman Niya kini pinaagi kang Jesus Cristo, mao kanay Iyang giingon. Ug si Cristo mao ang Pulong, “Sa sinugdan mao na ang Pulong, ang Pulong uban sa Dios, ug ang Pulong Dios. Ug ang Pulong nahimong tawo ug mipuyo tipon kanato. Ang mao kagahapon, karon, ug hangtud sa kahangturan.”

<sup>19</sup> Ang kinatibuk-ang butang mao ang dakung Eternidad. Ang Eternidad wala gayud nagsugod ug dili gayud matapos. Busa, sa niining dakung Usa nga Eternidad mao'y mga kinaiyahan, nga mamahimong Amahan, mamahimong Anak, mamahimong Manluluwas, mamahimong Mananambal, ug ang tanan niini anaa diha Kaniya. Ug ang butang lamang nga nagakahitabo karon, mao ang pagpasundayag sa Iyang mga kinaiyahan. Mao lang kana.

<sup>20</sup> Karon, ang atong mga ngalan nahibutang na sa Basahon sa Kinabuhi sa Cordero sa wala pa ang pagkatukod sa kalibutan. Ug sa diha nga ang Pulong miabot niana, kon kini aduna ma'y kahayag dinha nga gikatagana nang daan ngadto sa Kinabuhi, si Jesus miingon, “Walay tawo nga makaari Kanako gawas kon pagadanihon sa Akong Amahan, ug ang tanan nga gikahatag sa Akong Amahan moari Kanako.” Busa, makita ninyo, kini mao ang Pulong, sa walay puas, ang Pulong, ang Pulong.

<sup>21</sup> Karon, gusto kong mosulti niining gabhiona sa hilisgutan, sa pagkuha gikan sa unod niining teksto nga atong ginabasa, *Maila Ang Dios Pinaagi Sa Iyang Mga Kinaiyahan*.

22 Karon, ang halos tanang butang nga atong makaplagan maila pinaagi sa mga kinaiyahan niini.

23 Karon, atong mamatikdan, sama sa kinabuhi sa mananap, kuhaon mo pananglitan sama sa kinabuhi sa langgam. Karon, ipananglitan mo ang sama sa usa—usa ka yellowhammer, sa dihang siya nagalupad, ug ang usa ka jay bird, magkaparihas gyud sila kaayo kon tan-awon. Apan ang kinaiya sa yellowhammer, iyang ginakapakapa ang iyang mga pako ug nagapaubos, ug unya mopataas ug mopaubos, pataas ug paubos. Mao kana'y kinaiyahan. Kon inyong mamatikdan, ang jay bird nagalupad nga mas deritso.

24 Tan-awa ninyo ang pugo sa dihang mopaitaas kini, ang bobwhite na man, kon giunsa niini sa paglupad. Tan-awa ang pugong Gambel sa dihang mopaitaas kini, kamong mga mangangayam. Inyong makita, adunay pagkalahi. Tan-awa ang jacksnipe ug ang Wilson's snipe, ang kinaiyahan maoy nagapaila kon unsa kini.

25 Ang usa ka dakung carnero nga nagatindog diha sa kilid sa bukid, kon nakatalikod siya, ang luyong bahin sa samput puti, ang laing bahin pud abuhon. Kon wala ka nasayod sa kinaiyahan nianang maong carnero, mahimo nga usa ka usa kini. Kita n'yo? Kita n'yo, kinahanglan nga masayran mo ang ilang mga kinaiyahan, aron nga mamatikdan ang maoy unsa ug dili unsa. Daghan pang mga butang nga mahimong ipadayon natong hisgotan bahin sa kinabuhi sa mananap.

26 Dayon moadto kita sa tawhanong kinabuhi, sa mga kinaiyahan tali sa usa ka lalaki ug sa usa ka babaye. Adunay pagkalahi. Pareho silang tawo, apan ang mga kinaiyahan sa pagkalalaki ug pagkababaye mao'y nagapaila kanila. Nabasa ko niadto ang mahitungod sa usa sa mga problema nga gipresentar diha sa—sa pagsulay kang Solomon, sa reyna, nga gipasutan sa maong reyna ang pipila ka mga babaye sa mga saput nga panglalaki. Ug gipalakawlakaw sila ni Solomon ug gipabuhat ug pipila ka mga butang, dayon siya miingon, "Mga babaye sila." Kita n'yo, tungod nga masulti niya sa pamaagi sa ilang pagbuhat, nga ang—ang mga kinaiyahan nila iya sa mga babaye. May usa ka butang bahin niini, nga dili mo kini mahimong itago, nga kini—kini usa ka babaye tungod kay ang iyang—iyang kinaiyahan nagapaila kaniya nga maoy usa ka babaye.

27 Sama lang kini sa tuong kamot ug wala nga kamot diha sa mga tawo. Pareho silang tawo. Himatikdi n'yo, ang usa kanila tuohon ug walhon pud ang laing usa. Himatikdi ang ilang mga kinaiyahan nga nagapaila kanila, masulti mo kon sila ba'y tuohon—o walhon o dili. Kita n'yo? Labot pa pareho silang may mga kamot, ang maong duha ka mga kamot pareho gayud tan-awon, pareho gyud kaayo.

28 Modugang ako tingali ug diyutay'ng butang dinhi. Miingon si Jesus, sa Mateo, sa ika-24 nga kapitulo, nga "Sa katapusang mga adlaw, ang duha ka mga espiritu halos magkaparihas na kaayo hangtud nga ipahisalaag kini bisan ang pinili kon mahimo pa."

29 Karon, sama lang kana nga sa daw nagatan-aw ka sa tuong kamot ug sa wala nga kamot. Pareho silang may mga kumagko, mga kulamoy, mga kuko, gagmay'ng mga kulamoy, anlalabaw, uban pa, igtutudlo, tanang nagkalainlaing mga kulamoy. Sila, parehong igpapatik sa mga kumagko, ang usa lang paingon sa pikas ug ang usa paingon pud sa lain, pareho ra nga igpapatik, hinimo sa mao rang paagi, ang maong mga igpapatik sa kumagko. Ang tanan kaparehas gayud, ang pagkalahi lamang mao ang kinaiyahan sa mga niini. Ang usa maoy wala nga kamot ug ang usa maoy tuong kamot, mao lamang kana ang pagkalahi.

30 Ug mamahimong ingon niana gayud ang mga espiritu sa katapusang adlaw, maingon niana sila, ang kinaiyahan lamang niini mao ang mopaila kon kini ba'y iya sa Dios o dili. Ang usa kanila mamahimong husto ug ang laing usa mamahimong sayup, inyo lamang mahibaloan kini pinaagi sa kinaiyahan sa Dios. Mao gayud, kinahanglan mamahimong ingon-ana. Apan ang tuong kamot, mahimong ingnon nato nga maoy "husto," ug ang wala nga kamot maoy "sayup," kita n'yo, o bali-bali, usa kanila. Mail-han sila pinaagi sa ilang mga kinaiyahan. Mahibaloan mo lamang kini pinaagi sa kinaiyahan niini.

31 Sama sa Israel niadto sa iyang pagpanaw, nanggawas gikan sa Egipto. Karon, ang Dios kauban sa Israel, nagpakita Siya kanila ug usa ka dakung ilhanan didtong dapita, gipadala ang usa ka propeta kanila ug gipaila ang Iyang nasulat nga Pulong. Ug samtang ginadala Niya sila, atong mamatikdan ang Iyang kinaiyahan, kung giunsa Niya pagtagbo kang Moises, ang mga butang nga Iyang gibuhat. Ug sa iyang. . . diha sa dalan paingon na, nahiabot sila ngadto sa usa pang nasud, nga mao ang Moab. Ug usa ka dakung nasud ang Moab, karon, dili nga pagano, dili gayud. Kadto'y mga anak sa anak nga babaye ni Lot, ug mga magtotoo sila. Karon, himatikdi ang maong duha ka mga nasud. Ang usa kanila maoy usa na ka nailang nasud, ang laing usa na sab maoy usa lamang ka lumalangyaw. Ug karon nahiabot sila ngadto sa usa ka dapit diin kining bantugang nasud sa Moab napahiluna diha mismo sa dalan sa ilang pangatungdanan, paingon sa yutang saad. Karon aduna sila'y . . .

32 Tan-awa ang—ang maong duha ka nasud, ang matag usa kanila adunay propeta. Ang usa kanila mao ang bantugang magtutudlo ug propeta, nga si Balaam. Ug ang usa pud mao si Moises. Karon si Balaam milugsong gikan sa. . . aron sa pagtunglo sa Israel.

<sup>33</sup> Ug, himatikdi, silang duha parehong pundamental gayud. Ang propeta, mga pundamentalista gikan kang Balaam, miingon, “Tukori ko’g pito ka mga halaran,” kana’y tukma gayud nga numero sa Dios. “Ug maghalad ibabaw sa tagsa-tagsa ka halaran ug usa ka limpyong halad, usa ka lakeng baka,” nga katukma gayud sa mao rang halad nga aduna kanila didto sa kampo sa Israel. Ug miingon siya, “Sa tagsa-tagsang halaran paghalad usab ug usa ka lakeng carnero,” nga nagahisgot sa pag-abot ni Cristo. Ug didto sa Israel naghalad sila sa mao rang halad.

<sup>34</sup> Parehong mga halaran, mao ra nga Dios, apan ang usa kanila’y sayup ug ang laing usa pud mao’y husto. Ug karon ang paagi lamang nga masulti mo kon asay. . . Sa pag-abot na niini, sa pagka-pundamental, sa Pulong, pareho silang husto. Apan, makita ninyo, ang usa, sayup ang iyang mga motibo, ginapaninguhaan niyang putlon ang iyang igsoon gikan sa linya sa saad nga gikahatag na sa Dios kaniya.

<sup>35</sup> Ang usa pa ka butang, ang usa, ka propetang Balaam, pundamental, apan ang propetang si Moises naila pinaagi sa mga kinaiyahan sa Dios. Atua ang Haligi nga Kalayo, supernatural nga Kahayag nga anaa sa ibabaw kanila. Ug adunay dagkung mga pagpang-ayo diha sa ilang kampo, supernatural nga Dios nga nagapakita sa supernatural nga mga ilhanan. Ug nagapabilin gayud sila sa Pulong sa saad nga gikahatag sa Dios kang Abraham kaniadtong panahon nga ang maong duha ka mga nasud nagsugod pa. Apan, karon, aduna kang Moises ang saad kang Abraham, ang pag-adto sa yutang gisaad. Si Balaam, usa ka propeta usab sa Ginoo, mao’y nagabarug didto. Ug ang bugtong paagi nga imong maila, dili gikan sa ilang pundamental nga panudlo, apan pinaagi sa kinaiyahan sa Dios.

<sup>36</sup> Adunay lanog sa usa—usa ka singgit sa tingog sa Hari dinhi sa Israel. Ang pagtabon-sa-sala nagakatuman, usa ka Bitin nga Tumbaga, usa ka Batong gibunalan. Ug ang Dios kauban nila, ginapaila ang Iyang Kaugalingon diha sa supernatural nga Kahayag, ug ginaayo ang ilang mga sakit ug mga balatian samtang sila nagpadayon. Ang maong mga kinaiyahan nagpamatuod kung unsa Siya, nagapabilin diha sa linya sa Pulong alang niadtong kapanahonan, alang sa kapanahonan nga ilang ginapuy-an. Ang mga kinaiyahan sa Dios nagpaila sa Iyang Kaugalingon diha kang Moises. Kita n’yo, ang mga kinaiyahan sa Dios mipaila diha kang Moises. Ang Haligi nga Kalayo, ang pagtabon-sa-sala nga nagalihok, ang supernatural, ang Batong gibunalan, ug sila. . . ang Bitin nga Tumbaga usab, nga nagahisgot ug kaayohan, ug dayon—dayon atua sila usab sa linya sa pangatungdanan, sa saad sa Dios.

<sup>37</sup> Usab, dili natural ang kinaiyahan sa Dios. Supernatural ang kinaiyahan sa Dios, tungod kay usa Siya ka Magbubuhat. Usa Siya ka Supernatural. Ug sa diha nga ang kinaiyahan

sa Dios nagasugod na sa pagpadayag sa Iyang kaugalingon, lahi kini kaayo ngadto sa modernong pagpanghunahuna nga nagapakurat kini kanila. Dili sila makasabot Niini, sa gihapon wala gayud Siya nagalikay gikan sa Iyang saad. Ang Dios sa tanang mga kapanahonan, sa giingon ko, gipahatpahat ang Pulong.

<sup>38</sup> Mokuha lang kita, pananglitan, sa usa. Aduna si Jose, ang bana ni Maria. Ug karon gikasaad na siya ngadto niining batan-ong babaye, ug kaslonon na sila. Apan sa wala pa sila mag-ipon, nahikaplagan siya nga nagsamkon sa usa ka bata sa Espiritu Santo.

<sup>39</sup> Karon, nagatoo kitang tanan niana, kon kita mga Cristohanon. Kinahanglan toohan nato kana aron mahimong Cristohanon. Mao kana ang Biblia. Kinahanglan toohan mo ang matag Pulong diha sa Biblia, aron mamahimong usa ka Cristohanon. Karon, tungod kay kon ang Balaang Espiritu ania *dinhi*, puntohan niini ang matag Pulong ug matag saad nga inubanan sa “amen.”

<sup>40</sup> Tungod kay, karon, si Jose usa ka matarung nga tawo, buotan siya nga tawo. Ug walay duhaduha nga gisuginlan siya ni Maria sa pagbisita ni Gabriel, ug kon unsa nga pagalandongan siya sa Espiritu Santo, ug nga magasamkon ug manganak sa usa ka Batang lalaki, ug ang Iyang Ngalan pagatawgon ug “Jesus,” kon giunsa gayud nga gisulti niya kana kang Jose. Ug nga makatutok si Jose sa iyang dagkung brown nga mga mata, ug nga makita niya ang pagka-inosente niini, ug buot niyang toohan kana. Buot niyang toohan kini sa tibuok niyang kasingkasing, pero talagsaon kini kaayo, ug nakahunahuna siyang bulagan siya, sa hilum.

<sup>41</sup> Karon, kon ang tawo matinuuron niini, ang Dios magahimo’g pipila ka paagi sa pagpakita nianang tawhana nga kini’y Kamatuoran. Obligado Siya, kon ikaw matinuuron. Kung nakita mo Kini, ug mipahilayo ka Niini, nan ikaw pagahukman. Apan, kung ikaw matinuuron ug makita ang Kamatuoran!

Karon, si Jose “nakahunahuna” lamang. Miingon siya, “Talagsaon kaayo kini!”

<sup>42</sup> Ingong niana sa panahon karon, nga ang mga tawo, boutan nga tawo, maayong tawo, maayo’g kinaiya nga tawo, maayong mga ministro, daghan kanila, mga pari ug uban pa, maayong mga tawo, apan talagsaon kaayo gayud ang supernatural nga kapanghimatuuran sa saad niining adlaw, nagapakurat kini kanila. Ginahimo kining ingon niana tungod kay ginapadayag kini ang kinaiyahan sa Dios.

<sup>43</sup> Karon, si Jose, nga iyang bana, ingon nga usa ka matarung nga tawo, dili buot nga himoon siyang usa ka panag-ingnan sa publiko. Dili siya makatoo niini; iyang—iyang gisulayan. Apan



samtang iyang gihunahuna kining mga butanga, ang manulonda sa Ginoo nagsulti kaniya ug nagsugilon kaniya.

44 Karon, dili Niya kanunay kinahanglan makigsulti diha sa damgo, mahimo Niyang ipadayag kanimo ang Iyang Kaugalingon pinaagi sa Pulong, ug ipakita kanimo nga Kini'y husto, kon ikaw matinuuron gayud sa pagsusi Niini ug tanawon kon kini maoy kinaiyahan sa Dios nga nagapadayag sa kaugalingon niini, apan kanunay'ng pinasubay gayud sa gisaad nga Pulong.

45 Ug ang usa pa ka butang, kanunay'ng ginatul-id sa Pulong sa Dios ang sayup. Nagatoo ba kamo niana? Ang Pulong ang nagapanghimatuod niini. Sa diha nga ang Dios nagapanghimatuod nianang Pulonga, mao na kini.

46 Karon atong, may usa lang sa akong hunahuna nga gusto kong pamalandungan. Dili ta magdugay, tungod kay gusto pa natong moampo alang sa pipila ka masakiton. Tan-awon nato. Sa dihang si Jesus, ingon nga Pulong. . . Ang Biblia miingon nga Siya mao ang Pulong. Uyon kitang tanan niana, nga Siya mao ang Pulong. Himatikdi sa diha nga dose anyos pa Siya. Karon, wala kita'y istorya mahitungod Kaniya nga nag-eskwela. Apan usa ka diyutay'ng dose-anyos-nga bata nga mga *ingon-ana* ang katas-on, sila, ang Iyang ginikanan, si Maria ug Jose miadto sa templo sa pag. . . hangtud sa. . . aron sa pagsimba sa adlaw sa pasko. Ug samtang atua sila didto, misugod na sila pagbalik pauli human sa adlaw sa pasko, aduna sila'y tulo ka adlaw sa pagpanaw, ug dili na nila makita si Jesus bisan asa. Ug sa katapusan ilang nakaplagan Siya, human sa tulo ka adlaw nga pagpangita Kaniya, diha sa templo, nakiglantugi sa Pulong sa Dios kauban niadtong mga anciano.

47 Ug paminawi si Maria karon. Karon sa mga tawo nga nagalantaw kaniya nga usa ka babaye nga dios, tan-awa. Kita ninyo, ang—ang babaye mao'y nalimbongan sa sinugdanan. Ug himatikdi siya dinhi. Kon wala pa ninyo nahimatikdan kini, bantayi kini. Miingon siya, “Ang imong amahan ug ako nangita Kanimo, nga luhaan.” Himatikdi, iyang gisalikway ang maong pagpamatuod (atubangan niadtong mga pari) nga iyang gipahayag na. Miingon siya nga siya “nagsamkon pinaagi sa Balaang Espiritu,” ug dinhi iyang gitawag si “Jose” nga Iyang amahan.

48 Karon bantayi kanang maong dose ka tuig ang panuigon nga Bata, ingon nga mao ang Pulong nianang orasa. Siya ang gisaad nga Pulong alang nianang orasa, ang dinihogang Mesias. Himatikdi kung unsay Iyang giingon, “Wala ba kamo manghibalo nga Ako kinahanglan magapadayon sa mga buluhaton nga iya sa Akong Amahan?” Ginatul-id sa Pulong ang sayup. Kita n'yo, ug ang maong Supernatural, ang dose anyos nga Bata! Wala ako nagahunahuna nga nakasabot si Jesus sa

kon unsay Iyang giingon, apan Siya ang Pulong, ug ang Pulong nagatul-id sa sayup. Kita n'yo, Iyang gitul-id ang Iyang inahan, ug gibadlong siya sa maong pag-ingon. Karon, kon kini pa maoy—maoy bulohaton sa Iyang amahan, kauban na unta Siya sa iyang amahan, kon si Jose man ang Iyang amahan.

<sup>49</sup> Apan, kita n'yo, siya nga nagkabalaka gayud ug nakurat, sama kang Eva kaniadto, ug naimpluwensiyahan, aba, siya miingon, “ang Imong amahan ug ako nangita Kanimo, nga luhaan.”

<sup>50</sup> Miingon Siya, “Wala ba diay kamo mahibalo nga kinahanglan maanaa Ako sa buluhaton sa Akong Amahan?” Tan-awa kon giunsa nga matul-iron ang Pulong, nagatul-id Kini sa sayup.

<sup>51</sup> Nasayup si Satanas sa dihang gisulayan niya ang pagtintal kang Jesus. Apan gibalikan Niya nga gamit ang kaugalingon Niyang Pulong, ug gibuntog siya pinaagi sa Pulong.

<sup>52</sup> “Ang Dios,” ang Biblia miingon dinhi, “nga sa nagkalainlaing panahon ug sa nagkalainlaing mga paagi, nagpaila sa Iyang Kaugalingon ngadto sa Iyang mga propeta, misulti Siya ngadto sa mga amahan pinaagi sa mga propeta.” Karon, ginapadayag ang Iyang kinaiyahan sa pagpaila sa Iyang Kaugalingon, kita n'yo, ngadto sa tawo, nagsulti Siya ngadto sa mga propeta. Ang mga propeta, ang ilang mga panan-awon, nga gipanghimatud-an, maoy—maoy kinaiyahan sa Dios nga napadayag pinaagi sa panan-awon sa propeta.

<sup>53</sup> Karon, walay tawo nga makasaysay sa panan-awon, walay pamaagi sa pagbuhat niini. Kini'y supernatural. Usa kini ka butang nga imong makita sa unsay nangagi na, sa unsay karon, ug unsay mahimong mahitabo. Ug mao kanay pamaagi sa Dios, sa pagpadala sa tawo nga nagsulti niadtong mga butanga ug nagpakita sa mga butang nga mahitabo (dili lang niining gabhiona) sa matag gabii, sa matag higayon. Ang tanang butang nga iyang giingon kinahanglan ensakto gayud sa Ginoo, kinahanglan Pulong sa Ginoo.

<sup>54</sup> Pinaagi niini, ang mga gasa ug pagtawag walay pagbakwi. Dili mo mahimong brown ang imong mga mata sa dihang sila'y asul. Dili mo mahimong unom ka tiil ang gitas-on sa imong kaugalingon samtang ikaw upat lamang ka mga tiil. “Kinsa bay tungod sa pagkabalaka nakadugang ug usa ka siko sa iyang gitas-on?” Kita, pareho, kung unsa man kita pinaagi lang sa grasya sa Dios.

<sup>55</sup> Karon, ang mga gasa ug pagtawag dili mabakwi. Kining mga propeta natawo nga mga propeta na. Natawo si Moises nga usa ka matahum nga bata. Si Jesus maoy Anak sa Dios, gikan sa wala pa ang pagkatukod sa kalibutan, ang maong kinaiyahan sa Dios. Si Jeremias . . . dose, pito ka gatus ug dose ka mga katugan, sa pagtoo ko kadto, sa wala pa siya natawo, siya mao ang

tingog sa usa . . . Dili, pasayloa ko ninyo, siya ang giordenahang propeta ngadto sa mga nasud, ug kadto—kadto gibalaan na sa tagoangkan sa iyang inahan ug giordenahang propeta ngadto sa nasud. Si Juan Bautista, ang kon unsay akong ginahunahuna, ingon nga pito ka gatus ug dose ka mga tuig sa wala pa siya natawo. Siya mao ang tingog sa usa nga nagasinggit diha sa kamingawan.

<sup>56</sup> Kita n'yo, kini ang Dios nga nagapahiluna. Nagasugo Siya ug usa ka tawo, ginadala ang maong Pulong nianang kapanahonan. Apan karon sa dili mo pa mahimong toohan kanang Pulong nianang kapanahonan, Iyang ginapaila ang Iyang Kaugalingon sa Iyang kinaiyahan, kita n'yo, pinaagi sa pagpahibalo, pinaagi sa panan-awon. Iyang gisulti ang mga butang nga mahitabo, ug kini nagakahitabo. Ug ang Dios miingon, “Sa dihang nagakahitabo kana, nan toohi ninyo nga siya mao ang may paghubad sa Pulong, tungod kay ang Pulong sa Dios nagaabot niining tawhana.” Ug ang iyang kredensiyal nga siya mailhan ingon nga usa ka magtatan-aw, sa Daang Tugon. Daw sa unsa gayud kini ka tin-aw! Ang iyang mga kinaiyahan maila, masayran, sa iyang mga gikinaiya.

<sup>57</sup> Karon, kana'y sa unsa ang “Dios mipahigayon sa nagkalainlaing mga panahon,” ang Biblia nagaingon, “sa nagkalainlaing mga paagi, nagsulti Siya ngadto sa mga amahan pinaagi sa mga propeta, apan niining katapusang mga adlaw pinaagi ni Jesus Cristo, ang Iyang Anak, Siya nagapakigsulti.”

<sup>58</sup> Karon, miingon si Jesus, sa Juan 10:37, “Kon Ako wala magbuhat sa mga buhat sa Akong Amahan, nan ayaw kamo pagtoo Kanako.”

Kita n'yo, sila miingon, “Ikaw nga Tawo, ug nagapaka-Dios sa Imong Kaugalingon.”

<sup>59</sup> Siya miingon, “Kon Ako wala magbuhat sa mga buhat sa Akong Amahan, nan ayaw pagtoo Kanako.” Karon Siya miingon, “Si Juan maoy usa ka nagdan-ag ug nagasidlak nga suga. Kamo, mga bantugan, gikahamut-an ninyong molakaw diha sa iyang kahayag sulod sa usa ka panahon. Karon si Juan miingon, ‘Kinahanglan ako mawala na; Kinahanglan Siya magatubo.’” Siya ang Kahayag sa kalibutan, tungod kay Siya ang gipanghimatud-an, ang gipailang Pulong nga nahimong unod. Kita n'yo, Siya mao ang Dios ipon kanato.

<sup>60</sup> Ang mga propeta mao'y Dios nga kauban kanila. Maoy giingon ni Jesus. Siya miingon, “kon inyong ginatawag sila kinsa nagaabot ang Pulong sa Dios nga, ‘dios,’ unsaon man ninyo sa paghukom Kanako sa dihang ginaingon Ko nga Ako ang Anak sa Dios?” Kita n'yo? Busa kon diin gani ang Pulong nga gikasulti sa Dios gipanghimatud-an, nan kana mao ang Dios nga nagapadayag sa Iyang Kaugalingon pinaagi sa Iyang kinaiyahan, ginatuman ang Iyang Pulong. Wala na

Kini magkinahanglan pa ug paghubad. Gihubad na Kini, sa Kaugalingon Niini Mismo, ang nagapamatuod kon unsa Kini.

<sup>61</sup> Pareho lang sa Iyang giingon “maanaa ang kahayag” ug mitungha ang kahayag, dili mo na kinahanglan pang moingon, “Bueno, unsa man ang gipasabot niana?” Ang buot lamang ipasabot niini, diha na kini, kana ang nagapamatuod na niini. Nga Kini nahitabo na.

<sup>62</sup> Karon si Jesus miingon nga, “Kon Ako wala man magbuhat sa mga buhat sa Akong Amahan,” o sa laing mga pulong, “kung Ako wala ma’y kinaiyahan sa Akong Amahan, ayaw’g too niini. Sila ang nagapaila sa Akong kinaiya, kon Kinsa Ako. Kon dili kamo makatoo Kanako, nan toohi ang pagpaila nga gikahatag sa Dios. Kon kamo—kon kamo dili . . . Kon Ako dili man, kon ang Akong kinaiya wala nagapaila sa Akong posisyon, nan ayaw’g too sa Akong mga ginapahayag.” Kita n’yo? Nakuha ba ninyo kini karong gabhiona? Pila ba ang nakasabot niini, ipataas ang inyong kamot. Kita n’yo? “Kon ang Akong kinaiya wala mopaila kung Kinsa Ako sa akong gipahayag,” miingon si Jesus, “nan toohi ninyo ang . . . Kon dili kamo makatoo Kanako, aba, toohi lang ang—ang—ang pagpaila sa kinaiya nga nga mao Ako.”

<sup>63</sup> Sa Juan 14:12, “Siya nga nagatoo” si Jesus miingon “diha Kanako, ang mga buhat nga Akong ginabuhat iya usab pagabuhaton.” Karon tan-awa, “Siya nga nagatoo Kanako,” ang usa ka matuod nga magtotoo, “ang mga buhat nga Akong ginabuhat iya usab pagabuhaton.” Himatikdi. Sa laing mga pulong, ingon niini, “Siya nga nagatoo Kanako, pagailhon pinaagi sa Akong kinaiyahan, sa mga buhat.” Karon, mao kana kon unsay Iyang gihimo. Siya miingon, “Kon wala ko man ginabuhat ang mga buhat sa Amahan, nan ayaw pagtoo Kanako.” Ug ang Amahan nagsulti ngadto sa mga propeta, ug kadto mao ang ilang kinaiyahan, ang pagpaila. Mao pud kini kang Jesus. Ug gisaad kini ngadto kaniya nga nagatoo, “Ang Akong mga kinaiyahan magabuhat diha kaniya maingon sa gibuhat niini Kanako. Ug kon wala man Ako nagabuhat sa mga buhat sa Akong Amahan, nan ayaw pagtoo Kanako. Apan kon Akong ginabuhat ang maong mga buhat, ug dili kamo makatoo Kanako, nan toohi ang maong mga buhat, tungod kay gisulti na kini, kinahanglan mahitabo kini.

<sup>64</sup> Siya miingon, “Susiha ang mga Kasulatan, kay diha Kanila kamo nanaghunahuna nga kamo adunay Kinabuhi nga Walay Katapusan, ug Kini Sila mao ang nagatug-an kaninyo kon Kinsa Ako.” Mao kadto si Jesus, kita n’yo, ang Dios nadayag, nagapakita sa Iyang Kaugalingon. “Sila ang nagapamatuod kon Kinsa Ako.” Kana na ang Mga Hebreohanon 1:1 karon, “ang Dios sa nagkalainlaing panahon nagsulti pinaagi sa mga propeta,” klarong ginapaila ang kinaiyahan karon sa pagkabanhaw sa Iyang Anak. Ang Dios nagsulti pinaagi sa mga propeta kaniadto, pinaagi na sa Iyang Anak karon. Ang dili-mausab nga Dios, sa

mao rang kinaiyahan, “Ang mga buhat nga Akong ginabuhat, buhaton usab ninyo.” Ang Dios, napadayag pinaagi sa Iyang gipailang kinaiyahan. Mao kana kon unsaon ninyo sa pag-ila.

<sup>65</sup> Moingon mo, “Buena, ginasultihan ta ka *niini*, ginakanta namo *kini*, ginahimo namo *kini*, ug ginabuhat namo.” Dili kana mao’y akong ginahisgotan.

<sup>66</sup> Akong ginahisgotan ang bahin sa Pulong nga napadayag ug ginapaila ang...pinaagi niini, ang mga kinaiyahan sa gisaad nga Pulong alang sa maong kapanahonan.

<sup>67</sup> Nasayod silang mga Fariseo nianang Biblia ingon ka maayo sama sa uban, mas maayo pa kay sa nahibaloan ni bisan kinsa kanatong mga ministro karon. Kinahanglan nilang mabuhi pinaagi Niini. Ang ilang mga kaapo-apohanang mga sacerdote na. Ilang gitun-an Kini, adlaw ug gabii, ug napakyas silang makita kanang gipaila nga Pulong.

<sup>68</sup> Karon, si Luther miingon, “Sa dihang mitoo ka, naangkon mo na Kini.” Ang Methodist moingon, “Sa dihang misinggit ka, naangkon mo na Kini.” Ang Pentecostal miingon, “Sa dihang nagsulti ka’g mga dila, Anaa na Kini kanimo.” Atong nakaplagan nga sayup kana tanan! Ang uban kanila miingon, “Ania Kini sa bunga sa Espiritu Santo.” Ug sayup kini! Ang bugtong ebidensya lamang mao, ang mao’y kapanghimatuuran, sa diha nga ang Dios Mismo ginapaila ang Iyang Kaugalingon diha sa gisaad nga Pulong sa maong takna. Mao kana.

<sup>69</sup> Kinsa pa ba ang mas adunay daghang mga bunga sa Espiritu kay sa kanila kanhing mga sacerdote, nga maoy nagcircunsisyon sa mga bata ug nagpanalangin kanila, ug tanang uban pa? Ug ania niining tawo nga si Jesus, mitungha, gipangsipa ang ilang mga halaran, gipangtutokan sila nga may kapungot, gipangbunalan sila, gipangpalayas sila, sa walay bisan unsang pagpaila. Ang mga Kasulatan mao ang Iyang mga pagpaila! Wala Siya’y kard sa pagpakigkauban, wala Siya’y gipasakupan nga organisasyon. Apan ang Dios naghigot mahitungod Kaniya, mao kana’y Iyang pagpaila!

<sup>70</sup> Mao kana ang tinuod nga pagpaila sa Dios sa bisan unsang kapanahonan, maoy Iyang pagpaila. Mao kana kon unsa kini, ang mga Kasulatan nga gikasaad na, gipaila na pinaagi sa kinaiyahan sa saad nga mao ang Dios, ug ang Dios mao ang Pulong. Ug ang kinaiyahan nianang maong saad nga ginapaila, kanay nagapahimo sa magtotoo. Maoy giingon ni Jesus, ug kini mao na. Amen.

<sup>71</sup> Himatikdi, karon atong makaplagan, ang mga kinaiyahan mao’y nagapaila Kaniya. “Kon...” Siya miingon, “Kon kini wala nagabuhat niini, nan ayaw pagtoo Kanako.” Karon, gisulti ni Jesus aron ipaila Siya niini.

<sup>72</sup> Ug karon hinumdomi, nga niining mga adlaw, niining katapusang mga adlaw, miingon ang Mga Hebreohanon 1:1,

“Ang Dios, sa nagkalainlaing mga panahon ug sa nagkalainlaing mga paagi, nagsulti ngadto sa mga amahan pinaagi sa mga propeta. Niining katapusang adlaw nagsulti kanato pinaagi sa Iyang Anak, si Jesus Cristo.” Kita n’yo? Ang pagpaila sa Dios sa Iyang Kaugalingon napadayag sa mao rang paagi ingon sa Iyang gibuhathang unang panahon, nga ginagamit ang Iyang mao rang kinaiyahan. Amen. Himatikdi ang Mga Hebreohanon 13:8, nagaingon, “Siya mao sa gihapon kagahapon (sa nagkalainlaing panahon), karon, ug hangtud sa kahangturan mao ra!” Ang Iyang mao ra nga pamaagi, ang Iyang mao ra nga paagi, ang Iyang mao ra nga kinaiyahan, ang tanan mao ra sa gihapon! Ang Dios, ang dili-mausab nga Dios dili gayud mahimong mousab gikan nianang maong kinaiyahan nga mao usab Siyang dili mousab gikan sa Iyang kasugoan. Mao kana kon unsa Siya, Siya ang Pulong. Siya ang Pulong alang sa maong takna. Siya ang Pulong sa dihang gibuhathang Niya ang kalibutan, mao kadto ang Pulong. Sa dihang gibuhathang Niya ang tawo, mao kadto ang Pulong, ang Iyang mga kinaiyahan. Sa dihang gibuhathang Niya si Cristo, mao kana ang Dios, Immanuel. Ug sa diha nga Iyang gihimo Siya nga Manluluwas, mao kana ang Iyang kinaiyahan. Sa dihang Iyang gihimo Siyang Mananambal, mao kana ang Iyang kinaiyahan. Kita n’yo? Kini ang Pulong kanunay nga ginapaila, ang gipailang Pulong pinaagi sa kinaiyahan sa Dios. Himatikdi ang pamaagi, kanunay Siya, wala gayud Siya nagausb.

<sup>73</sup> Tan-awa ang tulo ka mga lalaki nga miadto kang Abraham, nagalingkod sa ganghaan sa iyang tolda niadtong adlaw. Tanawon nato siya didto sa pipila ka minuto. Miabot na siya, human na siyang gitawag pagawas sa yuta sa Caldeo, sa mga Taga-Caldeo, ug sa maong siyudad sa Ur. Gipahigawas siya sa iyang siyudad, pinaagi sa mga sugo sa Dios, nga ilain niya ang iyang kaugalingon gikan sa tanang dili-pagtoo. Mao kana ang unang kinaiyahan sa Dios, ilain ang imong kaugalingon gikan sa dili-pagtoo, sa dihang nagatawag Siya sa usa ka tawo!

<sup>74</sup> Ug Iyang ginahatagan siya ug usa ka butang nga sa bug-os, imposible gayud sa natural nga panghunahuna, nga toohan kini. Siya miingon, “Abraham, ang imong...” Siya kapitoan na ug lima ka tuig ang kagulangan, ug si Sarah kan-uman ug lima na. Sila, iyang igsoon nga babaye kadto sa amahan, nagipon sila sa sulod niining mga katuigan nga walay mga anak. Siya miingon, “Pagahatagan Ko ikaw ug usa ka anak nga lalaki pinaagi kang Sarah, ug siya, pinaagi kaniya, himoon Ko ikaw ug usa ka amahan sa daghanan nga mga nasud.” Karon, gitoohan niya kini.

<sup>75</sup> Nanglabay ang mga panahon, walay kausaban diha ni Sarah. Kita n’yo? Lagpas na siya sa maong edad, siya—siya naundangan na sa regla. Kan-uman ug lima, human na siyang milagpas nianang panahon. Si Abraham, kapituan ug lima,

ang iyang lawas mahimong isipon nga patay na. Ang iyang tagoangkan mahimong isipon nga patay na. Apan si Abraham wala gayud nagduhaduha diha sa saad sa Dios, pinaagi sa dili-pagtoo. Nagpadayon siyang nagatoo, tungod kay giingon kini sa Dios, ug nakabig, “Kon giingon kini sa Dios, ang Iyang kinaiyahan mao’y magpatuman sa kon unsay Iyang giingon!” Karon, kita maoy mga anak ni Abraham, ang Binhi ni Abraham! Padayon, padayon, bayente-singko na ka tuig ang nanglabay. Walay kausaban ni Sarah, wala gyud, nagkagulang lamang siya, nagkabaku na, ug mao usab si Abraham. Apan sa gihapon si Abraham nagtoo niini.

<sup>76</sup> Ug usa niana ka adlaw, sa dihang nakita sa Dios nga ang Iyang alagad matinguhaon nga mamahimong panagingnan alang sa mga tawo sa karon, ug pinaagi kaniya Iyang panalanginan ang mga nasud, diha sa usa ka mainit nga buntag sa mga alas onse ang takna, adunay tulo ka mga lalaking nagalakaw paingon kaniya. Nakigsulti sila kaniya. Ug iyang gipasulod sila aron sa paglingkod. Adunay butang diha kanila nga daw lahi kaysa tawo. Masabot sa espirituhanong butang ang espirituhanong mga butang. Himatikdi, ug miduol sila ug milingkod. Gihimatikdan sila ni Abraham, miingon siya, “Akong Ginoo.” Unsa bay iyang angay’ng buhaton?

<sup>77</sup> Duha kanila milugsong ug nagwali sa Sodoma, nga mao ang modernong pagpanghimatuod sa karong panahon. Adunay inyong tulo ka matang sa mga tawo: Sodoma, ug ang iglesia didto sa Sodoma, si Abraham nga pinili wala sa Sodoma. Duha ka mga mensahero, usa ka modernong Billy Graham ug... Hinumdomi, sa tanang mga mensahero ngadto sa iglesia, wala pa gayu’y usa ka tawo nga migikan sukad nianang sa-ngalanlamang nga iglesia dinha, nga nagahinapus ang iyang ngalan diha sa h-a-m, kaniadto. Nagkaaduna na’y Finney, Sankey, Knox, Calvin, uban pa, Billy Sunday, ug tanang uban pa, apan wala pa gayu’y G-r-a-h-a-m, o bisan unsang nagahinapus diha sa h-a-m, nga nagkahulogang “amahan sa mga nasud.” Miadto siya didto dapit, nga nagawali. Tan-awa ang maong takna! Ania ang mga nagapatoo-too, mga dili-magtotoo, ug mga magtotoo. Kining tulo ka mga tawo miabot. Ang duha kanila miadto sa siyudad, usa ka modernong Billy Graham ug Oral Roberts didto taliwala sa mga tawo, nagawali. Ang maong kahimutangan, mao’y gipahinungdan ni Jesus.

<sup>78</sup> Himatikdi, ang Pinili ginaanhaan, nagalingkod sa gawas nga itaas nga dapit dinhi, si Abraham ug ang iyang pundok. Ug sa diha nga kining Lalaki nga nagpabilin kang Abraham, himatikdi Siya, Iyang gipadayag ang kinaiyahan sa Dios, kay Siya miingon, “Diin si Sarah?” Ang iyang ngalan kanhi Sarai, sa miaging adlaw; karon kini Sarah na, S-a-r-a-h. Miingon “Abraham,” dili Abram, “Abraham, asa ba ang imong asawa, si Sarah?”

Miingon, “Anaa siya sa tolda sa Imong likod.”

<sup>79</sup> Miingon, “Pagaduawon Ko ikaw.” Dayon si Abraham naminaw nianang panulti-a. “Pagaduawon Ko ikaw pag-abot na sa panahon sa kinabuhi.”

<sup>80</sup> Ug mikatawa si Sarah, ingon sa nahitabo kaniadto, sa hilum, diha sa iyang kaugalingon, ug miingon, “Ako nga tigulang na, ug ang akong ginoo nga tigulang na, nga magkaaduna pa kami ug kalipay pag-usab sama sa batan-ong mga lalaki ug mga babaye? Sa kutob sa—sa tawhanong pakigrelasyon, tingali, milagpas na gayud sa daghang mga katuigan. Ako?” Mikatawa siya.

<sup>81</sup> Ug ang maong Tawo, nga nagatan-aw kang Abraham, sulod sa tolda sa likod Niya si Sarah, miingon, “Nganong mikatawa si Sarah, nga nagasulti niini, ‘Unsaon man pagkahimo niini?’” Iyang gipaila ang Iyang Kaugalingon.

<sup>82</sup> Ug gitawag Siya ni Abraham “Elohim.” Karon, si bisan kinsa kaninyong mga magbabasa sa Biblia nasayod niana. Elohim, ang Dios, ang Usa nga kasarangan sa tanan, kita n’yo, nagpaila diha sa usa ka tawhanong lawas nga nagakaon sa karne sa usa ka nati nga baka, nagainom sa gatas gikan sa baka, ug nagakaon sa tinapay ug mantekilya. Gipaila ni Elohim ang mga kinaiyahan sa Dios, ug gitawag Siya ni Abraham nga “Dios.” Unsa? Siya naila nga, Elohim!

<sup>83</sup> Si Jesus miingon, sa Lukas, sa ika-17 nga kapitulo, sa diha sa katapusang mga adlaw (ang Dios nga sa nagkalainlaing mga kapanahonan nagasulti pinaagi sa mga propeta, sa kaulahiing mga adlaw pinaagi sa Iyang Anak), karon himatikdi, Siya miingon, “Sa panahon nga ang Anak sa tawo igapadayag na.” Himatikdi, “nahipadayag,” gipaila diha sa katapusang mga adlaw sa dili pa ang panahon sa katapusan, sa diha nga ang Anak sa Tawo igapadayag na, kining Sodoma nga kahimtang mobalik pag-usab. “Maingon sa nahitabo kaniadto sa mga adlaw sa Sodoma, maingon man usab unya sa pag-abot sa Anak sa Tawo, sa dihang Siya igapadayag na, gipaila na ngadto sa Iglesia, ngadto sa mga Pinili (dili ngadto sa Sodoma o sa mga Sodomahon, o ngadto sa mga atua sulod sa Sodoma), ngadto sa Pinili.” Si Abraham mao ang Pinili. Ug ang harianong Binhi ni Abraham mao ang mga magtotoo, pinaagi kang Cristo Jesus nga Pulong, ug mao ang Pinili. Ug sa diha nga ang Anak sa Tawo igapadayag na, kanang kahimtanga magabalik pag-usab.

<sup>84</sup> Tan-awa ang kalibutan karon. Kon dili pa kini ang dayag na nga Sodoma ug Gomora, wala pa ko’y nakitang usa. Sodoma ug Gomora! Tan-awa ang iglesia, sama ni Lot nga nagalingkod didto ug nasakit gayud ang iyang matarung nga kalag samtang iyang nakita ang mga kasal-anan sa Sodoma. Kadaghanang ministro nga nagalingkod sa iyang. . . Usa ka maayong tawo nga diha sa iyang pagtuon, ginaandam ang iyang teksto ug uban pa, motan-aw diha sa dalan ug makita ang mga babaye nga nagsuot ug mga syorts, ug kalaw-ayan ug ingon nga mga butang, ug mga



butang nga nagapadayon nga ingon niana, dili niya mahimong isulti ang bahin niini, palagpoton siya sa iyang organisasyon. Walay kaisog si Lot nga mobarug alang Nianang maoy husto, mao man usab ang modernong Sodoma ug Gomorah karon.

<sup>85</sup> Apan adunay pipila niadtong aduna sa gawas sa Sodoma, nga natawo didto, dili pinaagi sa kabubut-on sa tawo, apan sa kabubut-on sa Dios ug ang Binhi sa Dios. Himatikdi ang maong timailhan didto, dili lang ang pagwali, apan ang ilhanan nagpaila sa Pulong sa Dios nga nahimong unod diha sa usa ka tawo. Ang maong kahimtang nagabalik usab maingon niini kaniadto, ug tukma gayud sa nianang maong adlaw. Ang tanan mao gayud, ang tanan nagakapareho gayud. Aduna pa unta kita'y panahon sa pagpadayon niini sa pipila ka mga minuto, apan wala na, busa dalion nato. Ang maong kahimtang mahibalik pag-usab sa katapusang mga adlaw.

<sup>86</sup> Karon, sa Mga Hebreohanon 10:1, “Ang Dios, sa nagkalainlaing mga panahon, pinaagi sa mga propeta, gipaila ang Iyang Kaugalingon. Ug sa katapusang mga adlaw gipaila ang Iyang Kaugalingon pinaagi sa Anak,” nga mao Siya diha sa Mga Hebreohanon 13:8, “ang mao ra kagahapon, karon, ug hangtud sa kahangturan.”

<sup>87</sup> Himatikdi, ang Dios, sa nagkalainlaing panahon, nakigsulti kang Moises. Ug karon, ug hinumdomi, Iyang gipaila ang Iyang Kaugalingon pinaagi sa usa ka Kahayag, sa Haliging Kalayo diha sa nagdilaab nga sapinit. Mao kana kon giunsa Niya pagbuhat niini sa nagkalainlaing mga panahon? Ug nakigsulti Siya kang Moises. Ug kadtong Kahayag, unsay gibuhath Niini? Kini nagpakita sa kinaiyahan sa Dios, gisulti Niini ang Pulong, “Hingdunggan Ko ang mga dangynguy sa Akong katawhan didto sa Egipto. Akong nakita ang ilang mga pag-agulo ug nadunggan ang ilang mga pagtu-aw, ug Akong nahinumduman ang Akong Pulong. Ako mokanaug, usa ka Haligi nga Kalayo, usa ka Kahayag, sa pag-adto ug pagluwas sa maong katawhan. Akong ginapadala ikaw, Moises.”

<sup>88</sup> Tan-awa ang mga kinaiyahan sa Dios. Nagpunit ug usa ka kinunkum nga balas ug giitsa kini sa kahanginan, ug nahimo kining langaw. Ang kinaiyahang Magbubuhath sa Dios atua kang Moises.

<sup>89</sup> Ug misulti si Moises, diha sa Deuteronomio 18:15, ug miingon, “Ang Ginoo nga inyong Dios magapatindog ug usa ka Propeta nga sama kanako.” Karon himatikdi, kana ang Pulong pag-usab, kinaiyahan. Ang Dios nga nagasulti pinaagi kang Moises, ginasultihan sila nga ang Ginoo magapatindog ug Usa nga sama kaniya. Karon himatikdi kung giunsa nga ang mga kinaiyahan ni Jesus nagpaila Kaniya nga mao kining gisaad nga Pulong. Sa dihang giingon ni Moises nga mamaingon niini, ang kinaiya ni Jesus ang mipaila niini. Himatikdi karon, “Ang

Ginoo nga inyong Dios,” kana’y Dios, kana mao ang Pulong, “magapatindog ug usa ka Propeta nga sama kanako. Ang si bisan kinsa nga dili motoo niana nga Propeta, pagapoohon gikan sa katawhan.” Karon himatikdi, sa dihang moabot si Jesus, nan unsa man nga matang sa kinaiyahan ang maanaa Kaniya? Kita n’yo, himatikdi karon ang maong gisaad nga Pulong, Siya ang gisaad nga mahimong usa ka Propeta nga sama ni Moises.

<sup>90</sup> Karon, aduna na sila’y tanang matang sa mga magtutudlo, tanang matang sa mga rabbi. Wala sila’y propeta diha sa upat na ka gatus ka mga katuigan, sukad—sukad ni Malaquias, ug sa hinanali ania miabot ang usa ka Tawo diha sa maong esena.

<sup>91</sup> Karon, adunay mananagat, duha sila, mga anak sa usa ka tawo, ug ang usa kanila, ang iyang ngalan mao si Andrew, ug ang ngalan sa laing usa mao si Simon. Gisuginlan sila sa ilang amahan nga kon unsaon sa pagbantay sa mga adlaw; nagkaaduna na’y daghang mini nga mga butang nga nanungha. Ang maong tigulang nga tawo... Akong nabasa sa usa ka higayon ang usa ka gamay’ng libro, diin, sulugilanon kini tingali, wala ako mahibalo, nga miingon siya, “Mga anak, karon nga sa dili pa gayud moabot ang Mesias, maingon sa ato na tanang ginapaabot, moabot ang panahon diin magkaadunay tanan nang matang sa mga butang nga magapanghitabo. Apan ang paagi nga inyong maila kining Mesias, mamahimong sumala gayud Siya sa Kasulatan. Mamahimo Siyang usa ka Propeta, tungod kay ang Pulong sa Dios nag-ingon nga usa Siya ka Propeta.”

<sup>92</sup> Nadungog ni Andrew si Juan. Bueno, ang gibuhat lamang ni Juan, mao lamang ang pagpropesiya. Kabalo mo, miingon si Jesus, “Nanglakaw kamo diha sa kahayag ni Juan, apan aduna Ako’y labi pang daku nga Kahayag kay kang Juan. Ako may labi pang daku nga timailhan kay kang Juan, kay, ang mga buhat nga gikahatag Kanako sa Amahan nga pagabuhaton, sila ang nagapamatuod Kanako.” Nagwali lamang si Juan, siya ang nag-una lamang, wala siya’y bisan unsang mga milagro nga gibuhat o sa bisan unsang mga kinaiyahan sa Dios alang sa saad. Apan ania nagaabot si Jesus nga aduna nianang kinaiyahan!

<sup>93</sup> Miadto si Simon sa pagpatalinghog Kaniya usa ka adlaw, ug diha pagka... Miadto si Simon tingali kauban ni Andrew. Nagsige na’g tambong si Andrew niadto. Apan, si Simon, sa dihang siya miabot sa Atubangan! Karon paminaw, ingon sa pagpatapos na. Sa dihang miabot na siya sa Atubangan ni Jesus, si Jesus mitan-aw kaniya, miingon Siya, “Imong ngalan si Simon, ug ikaw anak ni Jonas.” Kita n’yo, ang kinaiyahan sa unsay gikasaad na naila diha Kaniya.

<sup>94</sup> Kanang tawhana dili makasulat sa iyang ngalan, ang Biblia miingon nga siya parehong walay kahibalo ug walay nakat-onan. Apan usa kadto ka ingon nianang timailhan, nga dihadiha iyang gibiyaan dayon ang tanan niyang pakadili-matinoohon, ug

siya miingon, “Mao na kana ang Mesias nga among gipaabot!” Bueno, iyang gitoohan Kini.

<sup>95</sup> Mao usa nga nagatindog didto nga ginganla’g Felipe, kinsa midalagan libot sa siyudad, sa kabungturan, sa banwa, mga kensi ka milya, ug aduna siya’y amigo, mibalik sunod nga adlaw nga kakuyog siya, nga gingala’g Nathanael. Iyang nakaplagan siya ilalum sa usa ka kahoy, nga nagaampo. Miingon siya, “Ari ka, tan-awa kung Kinsa ang among nakaplagan, si Jesus nga taga-Nazaret, ang Anak ni Jose.”

<sup>96</sup> Siya miingon, “Kadiyut, kadiyut, kadiyut! Mamahimo bang adunay bisan unsang maayo nga motungha gikan sa Nazaret, gikan nianang pundok sa ubos nga matang sa mga tawo didto?”

Siya miingon, “Ari ka ug tan-awa!”

<sup>97</sup> Mao kana’y pinakamaayo, mao kanay pinakamaayo nga mahimong isulti sa usa ka tawo. Ayaw’g pabilin sa balay ug magpanaway. Pag-adto ug hibaloa, susiha ang mga Kasulatan! Ari ka, tan-awa!

<sup>98</sup> Diha sa dalan pabalik na, naglakaw na sila pabalik, nag-estoryahanay sa kung unsa na ang mga nagakahitabo, kon giunsa nga iyang gi-estoryahan siya bahin ni Simon nga nailhan Niya, ang iyang amahan ug uban pa.

<sup>99</sup> Dayon sa dihang nakaduol siya didto sa maong laray, tingali usa ka laray sa pagpaampo, tingali didto siya dapit sa mga mananambong, wala ako mahibalo. Apan kon asa man siya miabot, ug naglantaw si Jesus kaniya sa unang higayon, miingon Siya, “Tan-awa aniay usa ka Israelinhon, kang kinsa walay pagkalimbongan!”

Miingon siya, “Rabbi, kanus-a ba Ikaw nakaila kanako?”

<sup>100</sup> Miingon Siya, “Sa wala ka pa gitawag ni Felipe, sa dihang ikaw atua pa ilalum sa kahoy, nakita Ko na ikaw.” Mao kadto ang timailhan sa mga kinaiyahan sa dinihogang Dios.

<sup>101</sup> Miingon, “Rabbi, Ikaw ang Anak sa Dios!” Unsa man kadto? Ang Iyang mga kinaiyahan nga mipaila Kaniya. Nasayran niya pinaagi sa Kasulatan nga mao kadto ang dinihogang Tawo, ang Dios nga dinihogan diha sa unod. Ang Dios anaa kang Cristo, ginapasig-uli ang kalibutan ngadto sa Iyang Kaugalingon. Miingon siya, “Rabbi, Ikaw mao ang Anak sa Dios. Ikaw ang Hari sa Israel.”

<sup>102</sup> Miingon si Jesus, “Tungod kay gisulti Ko kana, nagtoo ka Kanako? Imong makita ang mga labaw pa niini.”

<sup>103</sup> Karon, may mga nagtindog sa duol didto, wala mitoo Niana. Miingon sila, “Kining Tawhana si Belzeebu, Siya’y usa ka manghihimalad.”

<sup>104</sup> Miingon si Jesus, “Ginapasaylo Ko kamo niana. Apan sa dihang moabot na ang Balaang Espiritu ang pagbuhat sa mao

gihapong butang, usa ka pulong batok Niini dili na gayud pagapasayloon bisan niining panahona karon o sa umalabot pa nga panahon.”

<sup>105</sup> Kita n’yo, ang pagbayad sa kasal-anan wala pa nahimo. Kita n’yo, dili pa mahimo, dili ka maka . . . Dili ka mahimong itambog ngadto sa infierno nga wala ka pa nakaatubang sa paghukom. Dili himoon kana niining nasud, dili pud himoon sa Dios. Kita n’yo, anaa ka sa usa ka dapit, anaa diha sa mga talikala sa bilangoan nagapaabot hangtud madawat mo ang paghukom. Ug, inyong makita, dili pa Niya sila matambog, tungod kay ang pagbayad sa kasal-anan wala pa nahimo.

<sup>106</sup> Apan human sa Iyang kamatayon, paglubong, ug ang maong Timaan migawas gikan sa Dugo, ang Balaang Espiritu, nan, ang pagsulti batok Niana, usa kini ka sala nga dili na mapasaylo. Usa lang ka pulong ang imong mahisulti batok Niini, dayon wala na gayu’y kapasayloan bisan asa pa man. Usa ka pulong pagbatok Niini, kita n’yo, daw sa unsa ka makalilisang nga butang kini.

<sup>107</sup> Karon, mao nga mahibaloan nato pag-usab, gipaila Siya niini ingon nga dinihogang Mesias. Ang Dios nga anaa kang Cristo, ang maong Pangbayad sa sala alang sa katapusang mga adlaw, si Cristo nga nagabayad sa sala alang sa katapusang mga adlaw. Karon, kang Nathanael, iyang—iyang—iyang gitooan Kini ug naila Siya.

<sup>108</sup> May usa ka gamay’ng babaye diha sa atabay usa ka higayon didto sa Sychar, usa ka siyudad sa—sa Samaria. Gikinahanglan ni Jesus nga moagi didto sa dihang Siya didto na sa Iyang dalan paadto, panaug mismo sa bungtod gikan sa Jerusalem, paingon sa Jerico, apan milibot pa Siya sa Samaria. Miingon Siya “kinahanglan nga moadto,” gipangunahan Siya sa Amahan pag-adto didto. Sa Iyang pag-adto didto, Iyang gipalakaw ang mga tinun-an. Ug milingkod, nahibulong, siguro, kung unsa kaha kadto.

<sup>109</sup> Karon hinumdomi, sa San Juan 5:19, miingon si Jesus, “Sa pagkatinuod magaingon Ako kaninyo, ang Anak walay mabuhat sa Iyang Kaugalingon, apan kon unsay makita Niya nga ginabuhat sa Amahan.” Karon hinumdumi, wala gyud Siya’y gibuhat nga usa ka milagro, nga wala pa Niya *nadunggan* kini, nga Iyang “nakita” kini. “Ang Anak walay mabuhat hangtud makita Niya una nga ginabuhat kini sa Amahan.”

<sup>110</sup> Kita n’yo, nagpakita kana kon unsa Siya kaniadto, kanang maong Propeta, Propetang Dios. Labaw pa sa usa ka Propeta, Siya maoy Dios! Ang tanan kung unsa ang mga propeta kaniadto, anaa Kaniya, labaw pa. Ang mga propeta adunay bahin lamang sa Pulong. Anaa Kaniya ang tanang Pulong, Siya mao ang Pulong diha sa Kinatibuk-an Niini. Apan himatikdi, “Ang Dios sa nagkalainlaing panahon nagsulti sa nagkalainlaing mga paagi, pinaagi sa mga diniyutay’ng bahin.

Niining katapusang adlaw, ang kinatibuk-an sa Pulong miabot diha sa Iyang Anak nga si Jesus Cristo, ang Dios nga nahimong tawo tipon kanato.”

<sup>111</sup> Kining gamay’ng babaye, nga dautan ang dungog, ginatawag nato siya, usahay, usa ka bigaon. Tingali ang maong bata nahimong libodsuroy sa dalan. Usahay sama karon, dili kini tanan kalapasan sa mga kabatan-onan, kalapasan kini sa mga ginikanan, nga gitugotan ang maong gagmay’ng babaye nga mogawas ug molihok sama niana. Tingali usa ka maanyag nga gamay’ng babaye, milakaw siya paadto didto sa pagkuha ug usa ka timba sa tubig, mga alas onse na ang takna.

<sup>112</sup> Karon hinumdomi, kon nakaadto ka na sa sidlakan, wala gayud sila miusab bisan diyutay, mao ra kini gihapon nga mga gawi. Mogawas ang mga babaye, ang mga ulay nagapangadto’g sayo sa atabay ug sa pagkuha sa ilang tubig, ang usa ka bigaon o usa ka dautan’g dungog dili makadungan kanila. Dili sila mahimong magkuyog.

<sup>113</sup> Kinahanglan nga mogawas siya human na nga nakakuha na ang tanan. Miabot siya, tingali’g kapoy, tingali nagkaaduna siya nianang bag-ongtrato, ang bana niya nianang gabhiona. Migawas siya, nga may banga niini, iya kining gibutang. Iya kining giayo, ang pangtimba, aron ipaubos kini, iyang nadunggan ang usa ka Tawong nagaingon, “Dad-i Ko ug mainum.”

<sup>114</sup> Mitan-aw siya ug iyang nakita ang may tungatungang edad nga Tawo nga nagatindog didto, daw sa ubanon na ang Iyang bungot. Siya mga sa katloan ka tuig ang edad, apan ang Biblia nag-ingon nga Siya daw sa kalim-an na ka tuig ang edad. “Ikaw usa ka tawo nga wala pa mosubra sa kalim-an ka tuig ang kagulangan, ug moingon Ka nga nakita Mo na si Abraham?”

<sup>115</sup> Miingon Siya, “Sa wala pa si Abraham, MAO NA AKO.” Kita n’yo? Kita N’yo, wala nila masabtan Kini. Iyang ginauyog silang mga dangan aron matakatak Kaniya.

<sup>116</sup> Karong panahona kinahanglan pa natong magpakiluoy ug maghangyo, ug mangpikipik ug magpakiluoy, ug manghaylo ug mangsaad sa mga Cristohanon, aron moadto sa simbahan, “Kon moadto sila sa simbahan, himoon namo ang ingon niini ug ingon niana.”

<sup>117</sup> Si Jesus, sa dihang dinhi pa Siya sa yuta, aduna Siya’y daghan kaayong nagkuyog-kuyog Kaniya. Mitan-aw Siya sa palibot ug nakita ang kongregasyon, gusto Niyang pahawaon sila, Siya miingon, “Gawas kon mokaon kamo sa unod sa Anak sa tawo ug moinum sa Iyang Dugo, wala kamoy Kinabuhi diha kaninyo.”

<sup>118</sup> Mapamalandongan n’yo ba ang usa ka doktor nga nagalingkod didto? “Aba,” miingon, “gusto niining Tawhana nga mamahimo kitang tawong bampira. Imnon ang Iyang Dugo?”

Binuang! Tanan kamong mga tawo palayo ug biyaeng mag-inusara kanang buangbuang nga Tawo.” Nanghawa sila.

<sup>119</sup> Wala gayud Niya Kini gipasabot. Dili Niya kinahanglan ipasabot Kini. Iyang tay-ugon ang inyong pagtoo usahay aron tan-awon kanang inyong buhaton. Ug ginabuhat Niya ang mao gihapong butang niining adlawa, oo, pasagdan kini nga daw sa makahahadlok kaninyo’g diyutay, aron makita kung asa kamo nagabarog, kung tinuod ba gayud kamo nga nagatoo.

<sup>120</sup> Hinumdomi, silang mga tinun-an, ang mga gikatakdo nang daan sa Dios, wala gayud natarug. Dili nila masaysay Kini, usab, apan dili nila gustong mobiya. Dayon mibalik Siya pag-usab, ang giingon Niya . . .

Tanan kadtong kongregasyon nanghawa, mga linibo.

<sup>121</sup> Siya miingon ngadto sa kapitoan nga nagalingkod didto, ang Iyang mga ministro nga gikatudlo Niyang manggawas ug nga mouna mangwali Kaniya, miingon Siya, “Hatagan Ko sila ug usa ka pagtay-og ug tan-awon kung asa gayud sila.” Busa Siya miingon, “Bueno, unsa bay inyong maingon sa dihang makita ninyo ang Anak sa tawo nga nagakayab na ngadto sa Langit kon diin Siya nagagikan?”

<sup>122</sup> “Ang Anak sa tawo nga nagakayab ngadto sa Langit? Nangisda kami kauban Siya, nanghigda kami sa mga daplin sa suba kauban Siya. Nangaon kami kauban Siya. Among nakita ang pasungan nga natawhan Niya. Nakaila kami sa Iyang inahan, sa Iyang mga igsoon. Ug kining Anak sa tawo nagakayab ngadto kon diin Siya nagagikan? Sa Nazaret man Siya gikan! Malisod kini nga panulti.” Nanghawa sila, usab. Sila miingon, “Dili nato masabot Kini.” Nakita ba ninyo? Unsay nahitabo? (Wala gayud matarug sila nga mga tinun-an. Dili nila masaysay Kini.) Silang tanan nanghawa. Wala gyud Niya Kini gisaysay. Dili man Niya kinahanglan pa.

<sup>123</sup> Karon aduna kitay mga tanum nga kinahanglan amumahon pa, nga gitawag ug mga Cristohanon, usa ka tawong imo pang bisbisan ug bebe-bebehon ug lingaw-lingawon, “Ug puedi ka bang makigkauban kanako, puedi ka bang makigduyog, puedi mo bang buhaton *kini*.” Oh, kamong pundok sa mga tanum nga kinahanglan pang amumahon! Nagkinahanglan kita ug matuod nga pagka-Cristohanon, nga natawo sa Espiritu sa Dios. Ug wala na kana nagkinahanglan pa ug pakigduyog, wala nay lain pa, wala na sila nagkinahanglan pa’g bisan unsa.

<sup>124</sup> Si Jesus miliso, gitan-aw silang mga tinun-an, miingon, “Mangbiya ba mo, usab? Gusto ba ninyong mobiya, usab?” Siya miingon, “Gipili Ko kamong napulo’g usa, ug yawa ang usa kaninyo. Nganong dili man kamo mobiya, usab?”

<sup>125</sup> Dayon gisulti ni Pedro kadtong mahandumong mga pulong, “Ginoo, asa man kami moadto? Hugot among pagtoo, nasayod

kaming Ikaw mao ang nailhang Tuburan sa Kinabuhi. Ikaw ang may Pulong, ug Kini lamang. Hugot kaming nagatoo.”

Nagatindog kining gamay’ng babaye didto. Miingon, “Dad-i ko ug mainom.”

<sup>126</sup> Miingon siya, “Dili kini mao ang nabatasan, aduna kita’y panaglainlain, wala kaming ingon niana dinhi.”

<sup>127</sup> Iyang gipakisayod dayon kaniya nga walay kalainan tali sa Judeo o sa bisan unsa niini kadto. Dios Siya. Miingon Siya, “Lakaw’g kuhaa imong bana ug balik dinhi.”

Mitubag siya, “Wala ako’y bana.”

<sup>128</sup> Siya miingon, “Nagsulti ka sa kamatuoran. Nagkaaduna ka’y lima, ug ang usa nga imong gikapuyo karon dili imo.”

<sup>129</sup> Karon bantayi kanang babaye. Adunay nahitabo, nianang gamay’ng predestinadong Binhi diha sa iyang kasingkasing!

<sup>130</sup> Sa dihang gisulti Niya Kana ngadto sa mga Fariseo, tan-awa sila, gipangitngit lamang nila kon unsa ma’y ilang mga gipahayag. Nagpahayag sila nga mga Cristohanon, nagpahayag sila nga mga sumusunod, nagpahayag sila nga gihigugma nila Siya. Apan sa dihang miabot na ang Kamatuoran, gingitngitan sila Niini.

<sup>131</sup> Apan sa dihang *kini* miabot, naghatud Kini ug Kinabuhi, gitangtang Niini ang kangitngit ug gipaputi kini tanan. Miingon, “Asa . . .”

<sup>132</sup> Miingon siya, “Sir, naila ko nga Ikaw usa ka Propeta. Karon, dili pa kami nagkaaduna’g usa sulod na sa upat ka gatus ka mga katugan, kita n’yo. Naila ko nga Ikaw usa ka Propeta. Karon, nasayod kami nga sa dihang moabot na ang Mesias, ang Iyang timailhan mamaingon nianang matanga sa kinaiyahan, Iyang gisulti kanamo kining mga butanga.”

Siya miingon, “Ako mao Siya nga nagapakigsulti kanimo.”

<sup>133</sup> Ug, diha niana, gibutang niya ang banga, miadto sa siyudad ug nag-ingon, “Umari kamo, tan-awa ninyo ang usa ka Tawo nga nagtug-an kanako sa nabuhat kong mga butang. Dili ba kini ang mismong kinaiyahan sa dinihogang Mesias nga mao ang Pulong, nga nasayod sa mga hunahuna nga anaa sulod sa kasingkasing? Dili ba kini ang maong Mesias?” Oh, sus!

<sup>134</sup> Tan-awa, ang maong babaye nga nagtalinugo, napaila Siya ngadto kaniya, pinaagi sa Iyang kinaiyahan, nga Siya mao ang Mesias. Ang babayeng nagtalinugo nailhan Siya, ang Pulong.

<sup>135</sup> Sa Mga Hebreohanon 4:12, ang Biblia nag-ingon nga, “Ang Pulong sa Dios gamhanan pa kay sa espada nga duhay sulab, ug Magtutugkad sa mga hunahuna nga anaa diha sa kasingkasing,” (pila bay nasayod niana?) “diha sa hunahuna.” Mao kana kon unsa ang Pulong. Nagatoo ba kamo nga Siya mao ang Pulong?

Nagatoo ba kamo nga Siya mao ra kagahapon, karon, ug hangtud sa kahangturan? Kana mao na kini, kon nagatoo kamo Niana.

<sup>136</sup> Himatikdi, miingon kining gamay'ng babaye, “Kon makahikap lang ako Kaniya! Dili ko igsapayan kon unsa man ang ginasulti nila bahin Kaniya. Nagatoo akong mao gayud Siya kon unsa ma'y Iyang giingon nga mao Siya. Kon makahikap ako Kaniya, mamaayo gayud ako.” Busa milusot gayud siya ug gihikap Siya. Mibalik dayon sa kadaghanan.

Mihunong si Jesus, ug miingon, “Kinsa bay mihikap Kanako?”

<sup>137</sup> Ug nahimo Siya ni Pedro nga daw sa usa ka kulangkulang, miingon siya, “Aba, ang tanan! Ayaw pagsulti'g ingon nianang mga butanga, aba, dili na sila kahibalo kung unsa ang hunahunaon bahin Kanimo. Usa ka Tawong anaa sa kahimtang Mo, ug unya moingon, ‘Kinsa bay mihikap Kanako?’ Ang tanan nagahikap man Kanimo.”

<sup>138</sup> Siya miingon, “Apan Akong naila nga naluya Ako, adunay gahum nga migula Kanako.” Nahibaloang may butang nga nahitabo!

<sup>139</sup> Karon tan-awa, tan-awa kung unsa ang sunod, ang sunod nga dakung makapakurat. Gitan-aw Niya ang palibot hangtud nga Iya siyang nakaplagan, ug Iyang gisultihan siya sa iyang kahimtang, ug nga ang iyang pagtoo maoy nagluwas kaniya. Siya'y . . . Nailhan Siya nga mao ang Pulong sa Dios, ginahibalo ang mga tinago sa kasingkasing. Oh, sus! Ginaila sa Pulong ang lawas, ginaila ang kasingkasing.

<sup>140</sup> Karon sa kadali lang, sa pagtapos na. Karon, ingon nga ang Mga Hebreohanon 13:8 matuod, “Siya mao kagahapon, karon, ug hangtud sa kahangturan,” nagatoo ba kamo Niana? Karon daghan akong ginalaktawan dinhi nga angay ko untang isulti. Dayon, ang Iyang kinaiya magapaila Kaniya karon niining panahona, kon Siya mao ra kagahapon, karon, ug hangtud sa kahangturan, sama lang nga mao Siya kaniadto. Husto ba kana? Iyang gisaad kini. Ug, hinumdomi, ang Iyang kinaiyahan maoy Iyang timailhan. Pila bay nakasabot niini, ipataas ang inyong kamot. Ang Iyang kinaiyahan mao ang Iyang timailhan.

<sup>141</sup> Sama niadtong nagagikan sa Emmaus, ingon sa pagsulti ko niini. Gilansang na si Jesus niadto. Masulub-on silang tanan. Atua sila sa maong lubnganan, karon miingon sila, “Adunay mianhi ug gikawat Siya.” Usa ka adlaw migawas Siya gikan sa kalibunan ug gikuyogan sila paglakaw, samtang Siya mipaingon sa Emmaus. Ug nagaingon sila . . .

Miingon Siya, “Nganong kamo—nganong nanagsubo man kamo?”

Ang ingon niya, “Bueno, usa Ka ka langyaw lamang dinhi.”



<sup>142</sup> Ug unya sa dihang napasulod na Niya sila, nagbuhat Siya ug usa ka butang sama sa Iyang gibuhat niini sa wala pa ang Iyang paglansang. Iyang kinaiyahan kadto ang paghimo niini sa ingon nianang paagi. Ug nakaila sila dayon, pinaagi sa Iyang kinaiyahan, nga kadto ang mao ra nga Jesus nga gilansang. Amen.

<sup>143</sup> Gibanhaw Siya sa Dios gikan sa mga patay, ug ang Iyang kinaiyahan sa pagkakaran, nga ingon niini, mao ra kini gihapon kaniadto! Ug ang pagbalik sa mga adlaw sa Sodoma, ingon sa gipanagna na ni Jesus, mahitabo ang mao gihapong butang “sa diha nga ang Anak igapadayag na ngadto sa mga tawo.” Ang timailhan niini sa Iyang kinaiyahan. Mga Hebreohanon 4:14 ug 15, “Siya karon ang atong Labaw’ng Sacerdote nga mahimong mobati’g kaluoy sa atong mga kaluyahon, sama gayud Kaniya kaniadto.” Nagatoo ba kamo niana? Matandog Siya sa atong mga kaluyahon. Bueno, kon mahimo Siyang matandog niini, unsa man ang Iyang paglihok kon Siya ang mao gihapon kagahapon, karon, ug hangtud sa kahangturan? Ang Iyang kinaiyahan mamao ra gihapon. Nan magabuhat Siya sama sa Iyang gibuhat sa diha nga ang babaye mihikap sa Iyang bisti. Nagatoo ba kamo niana? Nagapadayon Siyang buhi, Siya’y buhi sa hangtud, ug ang Iyang mga kinaiyahan nagapaila Kaniya sa gihapon sa karong panahon sama gayud Kaniya kaniadto. Ginatoohan n’yo ba kini sa tibuok ninyong kasingkasing? Ang Dios, naila pinaagi sa Iyang kinaiyahan, nagapaila Kaniya.

Atong iduko atong mga ulo.

<sup>144</sup> Langitnong Amahan, mga lalaki ug mga babaye lamang kami nga nagalingkod dinhi niining gabhiona. Apan kami, maingon kaniadto, ginadala ang Dios sa dihang among ginadala ang Pulong. Ug, Amahan, mahadlok ako sa pagsulti sa usa ka butang nga wala dinhi Niini. Mahadlok ako sa pagsulay nga ibutang ang akong kaugalingong paghubad Niini, tungod kay tingali’g masayup kini. Ug Ikaw nag-ingon, “Ang si bisan kinsa nga magataktak ug usa ka Pulong gikan Niini, o magadugang sa usa ka pulong ngadto Niini, ang iyang bahin pagataktakon gikan sa Basahon sa Kinabuhi.” Unsa na ma’y mahimong pulos sa akong kinabuhi kung ingon niana, Ginoo, kon buhaton ko ang usa ka dautang butang sama niana? Busa ako lang ginasulti Kini sa kung unsa lang Kini.

<sup>145</sup> Ug, Amahan, gisaad Mong ipaila Mo Kini. Nagatoo ako nga Ikaw nabanhaw gikan sa mga patay, duha na ka libo ka tuig ang milabay, ug buhi karong gabhiona, nagatawag sa usa ka yanong katawhan maingon sa Imong kanunay’ng ginabuhat, usa *dinhi* ug usa *didto*; walay mga grupo, walay mga organisasyon, walay dagkung matang sa kon unsa ma’y nahimo sa tawo. Apan Ikaw miingon nga Ikaw mokuha ug usa ka katawhan gikan sa mga Gentil, usa ka katawhan, “Duha sa umahan; usa Akong ibilin, usa kuhaon. Duha sa higdaanan; usa Akong ibilin, usa

kuhaon,” mga katawhan dinhi ug didto, alang sa Imong Ngalan, ang Pangasaw-onon.

<sup>146</sup> Nagatoo ako nga ang Imong kinaiya nagapaila Kanimo. Gisaad Mong, “Maingon sa nahitabo kaniadto sa mga adlaw sa Sodoma,” mao usab ang mahitabo sa adlaw sa dihang Ikaw ginapadayag na, ang Pulong. Ang Pulong Mismo, niining maong takna, maoy magapadayag sa Mismong Pulong, sama sa Pulong nga miabot ngadto sa mga propeta. Ug, Amahan, among makita si Juan nga nagatindog dinhi sa yuta, ug adunay—aduna ang Pulong nga iyang ginapadayag. Ug ang Biblia miingon, “Ang Pulong kanunay’ng nagaabot sa propeta.” Ug ang Pulong nahimong unod dayon, ngani miubog Kini sa tubig, paadto kang Juan. Ang Pulong miadto sa propeta.

<sup>147</sup> Amahang, Dios, umanhi Ka karong gabii, ako nagaampo, ug tabangi kami. Tabangi ang among kakulang sa pagtoo. Pasayloa kami sa among mga kakulangan. Ayoha ang mga masakiton ug mga balatianon. Usa lang ka Pulong nga gikan Kanimo, Ginoo, labaw pa ang katumbas niini kay sa bisan unsang mahimong isulti ni bisan kinsang tawo. Mosulti Ka lang, Amahan, usa lang ka Pulong magakahuloganon na ngadto sa kadagaya. Karon, Ikaw ang mao ra kagahapon, karon, ug hangtud sa kahangturan. Among ginatugyan ang among mga kaugalingon Kanimo karon. Ug nagaampo kami nga sa dihang mobiya na kami ug mamauli na niining gabhiona, magaingon kami sama niadtong mga gikan sa Emmaus, sa dihang nakita nila Siya nga nagabuhay sa usa ka butang sa pagpaila ngadto kanila nga Siya mao ang nabanhaw nga Ginoo. Bisan unsa pa’y ilang gipangsulti, “Ilang gikawat ang Iyang lawas, ug—ug ilang gibuhay *kini, kana, o ang uban pa,*” nasayod sila mismo sa ilang kaugalingon nga Siya nabanhaw gikan sa mga patay. Dili Mo ba ipakita kanamo karong gabii ang Imong Kaugalingon nga buhi nganhi kanamo pag-usab, ug pagatawgon kadtong mga ania niining maanindot nga siyudad ug sa palibot niini, nga gikatagana nang daan ngadto sa Kinabuhi, diha Kanimo. Kay among ginapangayo kini sa Ngalan ni Jesus. Amen.

<sup>148</sup> Karon, hangyoon ko kamo karon alang sa mga kensi ka minuto. Medyo malangan lang kita sa mga napulo ka minuto. Pagadalion ko. Gusto kong tawgon ang mga prayer card. Sa pagtoo ko si Billy . . . G, mga prayer card nga G, kana bay ilang gipanghatag? G, mga prayer card nga G, kuhaon nato ang usa ngadto sa kensi o bayente, mga ingon-ana. G, uno. Pila bay . . . Kinsa ba ang may G, unang numero, ipataas ang imong kamot, tan-awa kon ania ba dinhi. [Blankong bahin sa teyp—Ed.] Ug, hinumdomi, kupti ang inyong mga prayer card, maampoan kamo. Kung dili kamo maampoan karong gabii, buhaton nato kini. Uno, dos, tres, kuarto, singko, seis, siete, otso, nuebe, dyes, dinhi mismong dapita sa dali nga mahimo n’yo, ug moanhi dinhi dapit ug molinya. Sige. Uno, dos, tres, kuarto, singko, seis, siete.

Tulo ang wala dinha. Siete, siete, ug uno, dos, tres. . . ihapa sila, Roy, alang kanako. Sige, napulo. Segi, uno ngadto sa dyes. Kensi na karon, G, uno ngadto sa kensi, kana'y ken- . . . o dyes, onse, dose, tresi, katorse, kensi. Sige. Atong—atong ihunong dinha, kini lang. Sige.

<sup>149</sup> Karon, atong—atong paningkamotan nga tumanon ang atong gisulti, kita n'yo, nga mahuman sa alas nuwebe-y-medya, apan dili nato buhaton kini niining gabhiona, ako—ako—ako nahibalo. Apan karon gusto ko sa matag usa nga ihatag ang bug-os nga atensiyon.

<sup>150</sup> Karon, kung gisulti ko ang Kamatuoran ug gisulti kaninyo nga kining mga butanga mahitabo, ug kini maoy dinhi sa Biblia, nga kini na ang maong oras. Mahimong nahitudloan kamo diha sa ubang tulonghaan. Mao usab kaniadto ang mga Fariseo. Apan ang Biblia miingon, nianang adlaw, “Ang usa ka ulay magasamkon,” Siya. . . Nagsamkon siya. Miingon Siya nga mamaingon *niana* ang mga kinaiyahan sa Mesias. Nagkamao gayud. Apan wala nila gitoohan Kini. Wala kana nagpaundang Kaniya sa pagpadayon sa gihapon. Pareho ra niini karon. Nagapuyo kita sa katapusan nang mga oras sa katapusang adlaw.

<sup>151</sup> Nagaingon ang syensya nga tulo na ka minuto para tungang gabii. Sa pagtoo ko mas ulahi na kini karon kay niana, kay sa bisan unsang panahon. Gikamang na sa komunismo ang nasud, ug ang mga magwawali nangsunodsunod na sa komunismo imbis ni Cristo. Daw sa ginapagawas kini nga ginapaningkamotan sa pagkondena niana, nganong dili man tan-awon ang oras nga atong ginapuy-an? Komunismo, wala kita'y kahad. . . Sus, sus! Wala ako mahadlok sa komunismo. Kini mao ang masakpan kamong dili andam sa pag-anhi sa Ginoo, maoy kung unsa kini, ngadto sa iglesia. Karon itugot ang tanan, itugot sa tibuok Amerika nga mopasig-uli ngadto sa Dios, ug bantayi kung unsay mahitabo sa komunismo. Kinahanglan mong hibaloon ang sakit, ug dayon pangitaon ang tambal.

<sup>152</sup> Karon, ang tanan magmatinahuron, palihog ayaw'g lakawlakaw. Karon, pila man ang anaa dinha nga walay prayer card, ug gusto ninyong ayohon kamo sa Dios, ipataas lang ang inyong kamot, moingon, “ako—ako—ako nagatoo.” Bisan asa man kamo.

<sup>153</sup> Karon tan-awa, siguro nagaandar kini, [Ginahuyop ni Igsoong Branham ang micropono—Ed.] kini. Sige. Kon aduna kamo'y. . . Inyo ba akong madunggan sa likod dapit? Sige. Sige. Karon bantayan mo kini, Igsoong Roy.

<sup>154</sup> Karon, usa lang ka Pulong gikan sa Dios magakahulogan na'g labaw pa kay sa tanan na nga mahimo kong isulti.

<sup>155</sup> Karon, ingon nga nagalantaw gikan dinhi, malisod, kini—kini kanunay na. Kita n'yo, ang mga suga diretso gayud diha

sa imong nawong, ug daw sa malisod ang pagtan-aw dinha aron makita ang mga tawo.

<sup>156</sup> Ug dili ako makaila. Dili ko makita ang usa ka tawo, sa tinuod, nga mahimo kong makita nga kaila nako. Pila ba kaninyo ang mga dili ko kaila, ipataas ang inyong kamot, nasayod nga wala ako'y kasayuran bisan unsa diha kaninyo. Siguro bisan asang dapit na kini. Pila ba ang anaa sa linya sa pagpaampo ang nahibalo nga ako wala gayu'y kasayuran bahin kaninyo, ipataas ang inyong mga kamot. Ang tanan dinha sa linya sa pagpaampo, kon kamo makadungog kanako, ipataas ang inyong mga kamot kon—kon ako dili kaila ninyo. Ang matag-usa gayud.

<sup>157</sup> Karon unsa ba Siya? Siya ang Labaw'ng Sacerdote nga mobati'g kaluoy sa atong mga kaluyahan. Kadtong maong babaye nga mihikap sa Iyang bisti, tingali wala siya'y usa—usa ka prayer card, usab, apan iya Siyang nahikap ug, sa dihang nahikap niya, adunay nahitabo. Karon mao gihapong paghikap ang buhaton ninyo, hikapa Siya. Pila bay nasayod nga ang Mga Hebreohanon, sa ika-4 nga kapitulo, nagaingon, “Karon Siya ang Labaw'ng Sacerdote nga mahimong mobati'g kaluoy sa atong mga kaluyahan”? Pila ba ang nasayod niini? Bueno, igapahayag ba Niya ang mao ra nga Iyang kinaiyahan? Kon Siya ang mao ra gihapon kagahapon, karon, ug hangtud sa kahangturan, himoon Niya. Sige. Karon, kini ba ang. . .

<sup>158</sup> Igsoong Pearry, dad-a na sila kanako karon. Karon gusto ko sa matag-usa nga magmatinahuron gayud. Sa dapit dinhi, dinhi lang mismo, igsoong babaye.

Karon, makadungog ba kamo kanako? Karon, dili ako mahibalo. Tan-awa ninyo kung kinsa man ang—ang enhinyero dinha, kay wala ako'y kasayuran kon unsaon.

<sup>159</sup> Usa ka panan-awon. Karon, hinumdomi, dili ako ang Mesias, dili ako ang Cristo. Apan ania Siya karon dinhi. Mao kana'y akong ginapaninguhaan kaninyo nga makita, ania Siya, ginatuman Niya ang Iyang Pulong.

<sup>160</sup> Karon, kon kining maong babaye masakiton man, wala ako masayod. Wala ako makaila kaniya. Mas edaran siya kay kanako. Tingali natawo kami nga magkalagyo ang katuigan, ug minilya ang kalayoon, mao pa kini ang among unang panagkita.

<sup>161</sup> Karon, kana'y sama lang sa atong Ginoo nga mitagbo sa usa ka babaye, sa San Juan 4. Gipaninguhaan kong himoon kining klaro kaayo nga dili ninyo mahimong dili makita kini, kung ingon niana, sa Atubangan sa Hukmanan, wala nay panilngong dugo sa akong mga kamot nianang adlaw. Karon, misaad si Jesus nga sa katapusang mga adlaw mahitabo kini pag-usab. Samtang magapadayon kita sa tibuok semana, inyong mahibaloan. Usa kini ka saad.

<sup>162</sup> Karon, wala ako makaila sa maong babaye, usa kini ka paghinagbo sa usa ka lalaki ug usa ka babaye sa unang higayon.

Karon, kung igapahayag kanako ni Ginoong Jesus kung alang sa unsa ang imong pag-anhi dinhi, o uban pa man, o kon unsay imong ginabuhat, o kon unsa ma’y problema diha kanimo, o kon unsa man ang imong nabuhat, kon pinansyal man, sa pamilya, unsa pa man kini, magagikan kini kinahanglan sa supernatural nga Gahum, kay ako wala man makaila kanimo. Pila bay mosaksi niana, nga moabot kini kinahanglan pinaagi sa supernatural nga Gahum? Karon, makadula ka sama sa Fariseo, moingon nga usa kini ka. . . (Dapit sa pikas bahin, Igsoong Roy, tan-awa.) Makadula ka sama sa Fariseo, ug moingon, “Usa Kini ka dautang espiritu,” nga ginabuhat sa kadaghanan. Tali na kana kanimo ug sa Dios, kon ingon-ana. Nan madawat mo ang ilang balus. Apan kon ikaw moingon, “iya Kini sa Dios,” nan aduna kay balus Kaniya. (Karon, kana’y mas maayo na. Salamat.)

<sup>163</sup> Karon, tan-aw lang kanako sa kadali. Sama sa giingon ni Jesus. . . Sa dihang si Pedro ug si Juan milabay agi sa pultahan nga gitawag ug Matahum, miingon, “Tan-aw kanako.” Ako—ako wala makaila kanimo. Ug karon kon ang Balaang Espiritu, ang Usa nga gawas kanako, moabot ug mopadayag kon unsa ang anaa diha sa imong kasingkasing, nan ang ingon sa Biblia, “Ang Pulong sa Dios labi pang mahait kay sa duhay sulab nga espada, ang Magtutugkad sa mga hunahuna, sa mga katuyoan sa kasingkasing.” Mao kana sa kon unsay tukmang ginaingon sa Biblia. Karon, kung ingon-ana ginapadayag niana ang tinago sa kasingkasing. Karon, mahimong mao kana ang kinaiyahan sa Dios, ang Pulong nga nahipadayag niingon adlaw. Pila bay nagatoo niana karon? Karon nakita n’yo na ba kung unsa kini?

<sup>164</sup> Karon nawali ko na kini, gisultihan na kamo bahin niini, apan tinuod ba kini? Mao kana ang sunod nga butang, kita n’yo. Karon, kon tinuod man kini, ang matag-usa kaninyo. . . Kon dili man kini tinuod, mahibaloan kini sa babaye. Sigurado, mahibaloan niya kini. Mahibaloan ninyo kini, usab. Apan kon dili kini tinuod, nan ako—ako—ako nangsaksi nga sayup mahitungod kang Cristo. Kon kini Tinuod, kinahanglan ihatag sa matag-usa kaninyo ang inyong mga kasingkasing ngadto Kaniya, kinahanglan tohan Siya sa tibuok ninyong kasingkasing, ug kab-uton ug dawaton Siya alang sa bisan unsay inyong panginahanglan. Tinuod kana.

<sup>165</sup> Karon hinaut nga ipaila sa Balaang Espiritu ang Iyang Kaugaligon sa Ngalan ni Jesus Cristo. Karon, wala ako’y ideya alang sa kon unsay anaa ka dinha. Ikaw daw sa usa lang ka maanindot tan-awon, mainahanon nga babaye nga nagatindog dinha, ug mao lang kana ang nahibaloan ko bahin kanimo. Apan ang Balaang Espiritu makapadayag alang sa kon unsay ania ka dinhi, kon unsa ma’y imong sakit, o usa ka butang. Mahibaloan mo kon kini ba’y kamatuoran o dili. Karon, ikaw, ang unsay gusto nimong maampoan, mao’y usa ka butang bahin sa mga

ugat diha sa imong nawong. Kabahin kini sa sakit sa nerbyos, daw sa, diha sa imong nawong. Karon, kon tinuod kana, ipataas ang imong kamot. Nagatoo ka ba?

Karon, tingali moingon kamo, “Nasalagmaan lang niya kana.”

<sup>166</sup> Karon, usa siya ka maayong tawo. Karon, tan-aw dinhi sa kadali lang, igsoon. Wala ako kahibalo kon unsay Iyang giingon kanimo. Apan kon unsa man kini, tinuod kini. Ikaw, saksi ikaw niana karon, dili ba? [Ang igsoong babaye nagaingon, “Husto kana.”—Ed.] Husto kana. [“Sulod sa bayente ka tuig.”] Sus! Nagatoo ka ba nga ayohon ka sa Dios sa niana? Karon, nasayod ka na nga Iyang Presensya Kini, adunay Usa dinhi nga nakaila kanimo, adunay Usa. Sama sa giingon ni Jesus ngadto sa babaye, nasayod Siya kon diin ang iyang sakit, karon nasayod Siya kon diin ang imong sakit.

<sup>167</sup> Ug daw may gibug-aton ka alang sa usa pa ka tawo. Kini mao ang imong . . . Usa kini ka lalaki, imo kining bana. Ania siya dinhi, usab. Husto kana. Ug—ug nagatoo ka ba nga mahimong ipadayag sa Dios kanako ang sakit sa imong bana? [Ang igsoong babaye nagaingon, “Oo, nagatoo ako.”—Ed.] Usa siya ka masakiton kaayo nga tawo, aduna siya’y mga komplekasyon. Ang usa ka butang nga nagapabalaka kaniya, mao’y sakit sa kasingkasing. Aduna siya’y sakit sa kasingkasing. Kon tinuod kana, ipataas ang imong kamot. [“Husto kana.”] Aduna usab siya’y hernia. [“Husto kana.”] Husto kana. Kita n’yo? Husto ba kana? Oo. Ginanerbyos gayud, oo, ginanerbyos kaayo. Tinuod kana, dili ba? [“Oo.”]

<sup>168</sup> Kon ipadayag ni Jesus kanako! Gisultihan Niya si Pedro kung kinsa siya. Kon ipadayag Niya kanako kung kinsa ka, motoo ka ba nga kini mao Siya? [Ang igsoong babaye nagaingon, “Oo.”—Ed.] Dili ka taga dinhi. [“Dili.”] Nagagikan ka sa sidlakan dinhi, gikan ka sa Louisiana. [“Husto.”] Husto kana. Husto. Ug ang imong ngalan mao si Mrs. Coleman. [“Husto kana.”] Pauli ka na, giayo ka na ni Jesus Cristo. Ang imong pagtoo mao’y nag-ayo kanimo.

<sup>169</sup> Karon toohi. Nagatoo ba kamo sa tibuok ninyong kasingkasing? Si Jesus Cristo nga ginapaila ang Iyang Kaugalingon diha sa Iyang pagkabanhaw! Nakita n’yo ba unsay buot kong ipasabot? Karon, ang si kinsa man nga may normal nga panghunahuna, nasayod nga walay tawong makahimo niana.

<sup>170</sup> Karon, kamong anaa dinha, isulti ninyo sa Dios ang ingon niini, “Ako—ako—ako nasayod nga ang maong tawo wala makaila kanako, busa ako magaampo alang sa usa ka butang. Ginoo, mahimo ko bang hikapon ang Imong bisti? Kon kini mao gayud, nan Imong gipaila ang Imong Kaugalingon diha sa Imong pagkabanhaw. Lingia, itugot nga mahikap ko Ikaw, ug

unya makigsulti Ka kanako pinaagi kaniya.” Tan-awa kon unsay magakahitabo. Sulayi lang kini.

171 Kumusta ka, sir? Mahimo ka bang makaduol dinhi dapit ug diyutay pa? Adunay mga tawo sa luyo nimo dinha, kita mo.

172 Tanang butang karon, inyo niining matag—matag espiritu, maoy sama lang sa usa ka pitikpitik sa kasingkasing. Madungog mo kini, kita n’yo, mahibaloan usab ang ilang hunahuna, ug nagakahimo kining, kita n’yo, nagakalibog ka na.

173 Nagatoo ka ba kanako nga Iyang alagad? Nagatoo ka ba nga mahimong ipadayag ni Cristo kanako ang hinungdan kung unsay ania ka dinhi? Hinumdomi, nga magkatagboay ra kita sa Atubangan sa Hukmanan pipila ka adlaw ug igapatubag alang niining gabhiona. Nasayod ka ba niana? Ang imong sakit, usa niini, ang anaa sa imong likod. Aduna kay daghang sakit. May sakit ka sa likod. Ug nagakaluya na ang imong pananaw, aduna kay problema sa mata. Kon husto kana, ipataas ang imong kamot. Karon, ginahimo mo usab ang usa ka butang nga gusto mong biyaan. Puede lang ba nga isulti ko kini? Gusto mo nang undangan kanang pagpanigarilyo. Ug—ug usa pa, aduna kay... gibati mo nga mao kana ang butang sa una pa nga nagababag kanimo sa pagdawat sa Balaang Espiritu. Karon gusto mong madawat ang Balaang Espiritu, kana maoy tinguha sa imong kasingkasing. Husto kana, iwarawara ang imong mga kamot nga ingon *niini*. Bueno, mibiya na kini kanimo karon, lakaw, dawata ang Balaang Espiritu, ug mamaayo na. Ang Dios magapanalangin kanimo, sir.

174 Nagatoo ba kamo? Karon palihog pagmatinahuron gayud. Karon nagkagabii na ta kaayo, pagpabilin lang usa nga nakalingkod sa makadiyut lang.

175 Kumusta ka? Dili kita magkaila sa usa’g-usa. [Ang igsoong babaye nagaingon, “Oo.”—Ed.] Nakaila ang Ginoong Jesus kanatong duha. Karon ayaw’g kahadlok, kita mo, daw ikaw sa... Kita mo, relaks lang, Iya kining Presensya. Kita mo, mao kini. Mao kini ang Iyang Presensya. Karon aduna kay gibating lahi kaayo, lahi gayud, daw sa malulot, daw sa mapainubsanong pagbati. Kita mo? Karon, ang pagtindog sa atubangan sa usa ka lalaki dili makapabati kanimo sa ingon niana.

176 Pila man ang nakakita na nianang Kahayag, kanang Haliging Kahayag, Kalayo? Nakudakan Kini dinhi mismo sa Texas, sa unang higayon, ikaduhang higayon. Nagpatungod Kini mismo ibabaw sa babaye, kita n’yo, niining maong dimensyon karon. Tinguha ko unta nga inyo lang...kon inyo lang unta makita.

177 Sa dihang mosugod na kamo sa paglakawlakaw, mao kana’y nagapaingon niini, kita n’yo. Ugma sa gabii magkaaduna kita niining maong linya sa pagpaampo sa alas nuwebe, kita n’yo,

Ako—akong nalangan na kamo sa dugay. Sugdan na nato kining usa ka babaye, kon ingon-niana. Sa kadali lang.

<sup>178</sup> Nagatoo ka ba, nga nagalingkod dinha? Oo, kay kanang kaluyahon diha nga nakapasamok kanimo, mao kanay problema. Kita n'yo? Unsa man ang iyang gihikap? Wala ako makaila sa maong babaye. Gihikap niya ang Labaw'ng Sacerdote. Apan, kita n'yo, nakatalikod ako kaniya, sama sa gibuhat kini sa panahon ni Abraham. Dinhi, tan-aw dinhi dapit, igsoon, sa kadali lang. Daw sa may gibug-aton ka diha sa imong kasingkasing. Kini maoy. Ang imong anak kini nga babaye didto sa likod. Aduna siya'y sakit diha sa iyang mga dalunggan. Husto kana. Nagatoo ka ba karon sa tibuok mong kasingkasing? Sige, toohi lamang karon, ug siya mamaayo na.

<sup>179</sup> Nasabtan ba ang buot kong ipasabot? “Kon mahimo mong toohan, ang tanang butang mamahimo.” Nagatoo ka ba?

<sup>180</sup> Adunay gamay'ng babaye nga mipaubos sa iyang kamot diha sa likod, nagatan-aw siya diretso kanako. Nagaantus siya sa diabetes. Nagatoo ka ba nga ayohon sa Dios kana nga diabetes, nga nagalingkod dinhang dapita? Sige, maangkon mo ang kon unsay imong ginapangayo, kon ingon-niana. Toohi lamang.

<sup>181</sup> Ang babayeng dinha dapit gikan nimo, may sakit sa colon ug sakit sa pantog. Nagatoo ka ba nga ayohon kana sa Dios, himoon kanang mamaayo na? Sige, madawat na nimo ang unsay imong ginapangayo. Ang kamot sa maong gamay'ng babaye. Kita n'yo, karon tan-awa, pangutan-a lang siya, Adunay Butang nga makalilipay kaayo ang miigo diha kaniya. Kita n'yo, ang iyang pagtoo, ang maoy nakapahimo niini. Kini'y dili ako. Ang Dios Kini.

<sup>182</sup> Dinhi, ania ang usa ka tawo nga nagalingkod dapit sa tumoy. Aduna siya'y sakit sa bronchia, kining nagalingkod nga gulangon na nga tawo nga nagatan-aw kanako. Nagatoo ka ba nga ayohon kana sa Dios, sir? Kanang usa ka babaye nga nagalingkod sunod kanimo nagaantus siya sa impeksyon diha sa iyang lawas. Tinuod ba kana, igsoon, iwarawara ang imong panyo kon tinuod kana. Sige. Sige, magpandonganay kamong tanan sa usa'g usa, toohi diha sa tibuok ninyong mga kasingkasing. Amahan ug anak nga babaye, nganong dili man? Ipandong ang inyong mga kamot sa usa'g usa ug toohi sa tibuok ninyong kasingkasing, pagaayohon kamo ni Jesus.

Ako—akong ginahagit ang inyong pagtoo sa pag-too!

<sup>183</sup> Ang babaye nga nagalingkod sa likod niya dinha, nag-antus sa sakit sa tiyan. Nagatoo ka ba nga ayohon ka sa Dios, gining? Mao kanay imong sakit. Kon husto kana, tindog aron ang mga tawo makakita. Kita n'yo? (Kinsa ba ang ilang ginahikap dinha?) Ingon, wala ko masayup, kana'y imong inahan nga nagalingkod sa luyo nimo diha. Aduna siya'y impeksyon sa iyang mga tinae.



Nagatoo ka ba nga ayohon kana sa Dios, gining? Tindog, pud, ug maayo na.

<sup>184</sup> Toohi! Siya ang mao ra kagahapon, karon, ug hangtud sa kahangturan. Iyang ginapaila ang Iyang Kaugalingon. Nagatoo ka ba kanako nga maoy Iyang propeta, o alagad? Nagapapangdol sa mga tawo kana, ang pag-ingon, “propeta,” dili sila kasabot.

<sup>185</sup> Tan-aw dinhi. Nagatoo ka ba sa tibuok mong kasingkasing? Nagaantus ka sa grabing pagkanerbyos. Nagatoo ka ba nga masugid ko kanimo kung unsay hinungdan niini? Naaksidente ka sa sakyanan. [Ang igsoong babaye nagaingon, “Husto kana.”—Ed.] Husto kana. Husto kana, pagkaguba sa sakyanan, ug nakapasakit kini sa imong likod ug mipaingon sa imong abaga. Husto ba kana? Biyaan ka na niini karon. Panahon lang diha sa kinabuhi ang misamok niini, nagapasamut niini, apan mamaayo ka na. Lakaw, toohi sa tibuok nimong kasingkasing. Pagaayohon ka na ni Jesus Cristo, kon toohan mo. Amen.

<sup>186</sup> Nagatoo ka ba? Nagatoo ka ba nga mahimo Niyang ayohon ang arthritis? Bueno, padayon lang sa paglakaw unya, pagaayohon ka na Niya.

<sup>187</sup> Pila ba ang nagatoo diha sa tibuok ninyong kasingkasing, moingon, “Ginatoohan ko gayud sa tibuok kong kasingkasing?” “Kon mahimo mong toohan!”

<sup>188</sup> Nagatoo ka ba nga nagapang-ayo Siya ug diabetes ug nagapang-ayo sa mga tawo, nga may sugar diabetes, ug ginaayo sila? Ginatoohan mo ba kini? Padayon lang sa paglakaw, moingon, “Ginoo, ginapasalamatan ko Ikaw alang niini.” Toohi sa tibuok nimong kasingkasing, ug ikaw mamaayo na.

<sup>189</sup> Pila ba ang nagatoo karon dinha, sa tibuok ninyong kasingkasing? Ayaw, kita n’yo, naglakawlakaw na sab kamo, inyong ginadisturbo Kini, mga higala. Sultihan ko kamo, Pila ba ang nagatoo? Ipataas lang ang inyong kamot, moingon, “Nagatoo ako sa tibuok kong kasingkasing.”

<sup>190</sup> Karon hangyoon ko kamo sa pagbuhat ug usa ka butang. Karon, kon gituman ni Jesus ang Iyang Pulong, ug gitoohan kana, ug gipamatud-an kini diha kaninyo, si Jesus miingon usab niini, ang Iyang katapusang sugo sa Iyang Iglesia, “Kining mga ilhanan maganunot kanila nga nagatoo.” Karon pila ba ang nagatoo? Siya miingon, “Kon ipandong nila ang ilang mga kamot diha sa masakiton, mangaayo sila.” Nagatoo ba mo nianang saara? Nan ipandong ninyo ang inyong mga kamot diha sa usa sa sunod kaninyo.

<sup>191</sup> Kon dili ka Niya ayohon, mamatay ka. Ikaw gilandongan. Apan si Jesus Cristo nagaayo na kanimo. Ginatoohan mo ba kini? Sige, ibutang ang imong...lakaw ug karon toohi, ug mamaayo ka na.

<sup>192</sup> Duol ngari gining. Nagatoo ka ba nga ayohon sa Dios kana nga TB ug diabetes, pagaayohon ka? Kuhaa . . . Sige, lakaw, toohi sa tibuok mong kasigkasing, ug mamaayo na.

<sup>193</sup> Nagaampo, nagainampoay ba mo sa usa'g-usa? Ipondong ang inyong mga kamot diha sa usa'g-usa, mag-ampo na lang kita, sa dungan. Ang matag-usa ipandong ang inyong mga kamot sa usa'g-usa. Nagkagabii na gyud. Ibutang ang inyong mga kamot diha sa usa'g-usa, ug mag-ampo kita.

<sup>194</sup> Ginoong Jesus, sigurado kami nga ginapaila sa Dios ang Iyang Kaugalingon taliwala sa Iyang katawhan. Ang Iyang mga kinaiyahan, ingon nga mao ra kagahapon, karon, ug hangtud sa kahangturan, nagapadayag sa ilang mga kaugalingon. O Ginoong Dios, Ikaw Nga Mao'y naghimo sa saad sa Pulong, Ikaw miingon, "Kining mga ilhanan maganunot kanila nga nagatoo. Kon ilang ipandong ang ilang mga kamot sa masakiton, sila mangaayo." Kining mga tawo nagpahayag nga mga magtotoo, mga magtotoo diha sa nabanhaw na nga Jesus Kinsa mao'y nagapaila sa Iyang Kaugalingon karon pinaagi sa Iyang mao ra gihapong kinaiyahan nga mao Siya kaniadto sa dihang dinhi pa Siya sa yuta, ginahimo ang mga Kasulatan nga positibo nga Kamatuoran, nga Siya mao ra kagahapon, karon, ug hangtud sa kahangturan. Ginoong Jesus, uban niining mga magtotoo nga nakapandong ang ilang mga kamot diha sa usa'g-usa, diha sa Balaanong Presensya sa nabanhaw na, nga giila nga Anak sa Dios Kinsa nahimong unod tipon kanamo pag-usab niining gabhiona diha sa lawas sa Iyang mga magtotoo, akong ginamandoan ang matag mahugaw'ng espiritu, ang matag balatian ug sakit, sa paghawa gikan niining mga tawo, ingon nga nakapandong ang mga kamot niining mga magtotoo diha sa usa'g-usa. Sa Ngalan ni Jesus Cristo, hinaut nga mamaingon gayud kini.

<sup>195</sup> Ang tanan nga motoo sa inyong kaayohan karon, nga nagatoo na niana karon, diha sa gipailang Presensya sa nabanhaw na nga Anak sa Dios, nga inyong ginatoohan nga ang inyong hangyo gikahatag na kaninyo, ug ilhon ang mao mismong butang, tindog ug moingon, "Akong ginadawat kini sa tibuok kong kasingkasing." Pagtindog, ang tanan, diha sa Presensya ni Jesus Cristo, nga motoo. Dayga Siya! Ihatag Kaniya ang pagdalayeg ug paghimaya. Ipataas lang ang inyong mga kamot ug ihatag Kaniya ang mga pagpasalamat. Pamatud-an sa Dios ang matag saad nga Iyang gisaad.



*MAILA ANG DIOS PINAAGI SA IYANG MGA KINAIYAHAN* CEB64-0311  
(God Is Identified By His Characteristics)

Kining Mensahe ni Igsoong William Marrion Branham, una giwali sa Ingles niadtong Miyerkoles sa gabii, Marso 11, 1964, sa Municipal Auditorium sa Beaumont, Texas, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2010 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)